

TANGA PIPENGE DUPA KATAISAME JONE-KISA PANASIAMO DOKO

Pii atupa wambao kandapenge

Tanga pipenge dupa Jisasame Jone-kisa panasiamopa baame pepa pia-pyaa. Joneme kandeamopa dupanya pii yalo pyoo latae netesa endakalimi kongali joo setaminopa Kitiseneme tenge angi sepengedupanya lao lea-pyaa. Kitisene dupame Jisasa doko nyakamanya Kamongona lao masoo miniamino tenge dokonya kenda pipaepi tanda nengepi longo nyiami-pyaa. Gii dokopa Jisasame Jone-kisa panasiamo dupa Joneme pepa pia-pyaa. Masoo miningi tenge dokonya tanda longo nawapi elya pisowapi pingi lamo lao masetala masoo miningi doko maita maitamini lao Kitisene dupa kyoto joo katena lao pepa dake pia-pyaa.

Joneme mupa joo lao pituu, Kamongo Jisasa Kataisanya kaitini dokonya Goteme baanya yandapipi dupa pitaka ita minata. Kiningi, Satane apata ita minata. Baame ita minatala kaitipi yuupi dupa enenge setatamopa baanya endakali dupa dokonya auu pyoo etete katatami.

Tanga pipenge dupa Kataisame Jone-kisa panasiamo dokonya pii lyaa dupa:

- 1:1-8 Pii wambao pepanya piamo dupa
- 1:9-3:22 Sosa kalanganya pepa pyao pyasakamaiyamo dupa
- 4:1-8:1 Kende kalangeme buku yaki petae kateamo doko
- 8:2-11:19 Beto kalange dutupa
- 12:1-13:18 Kanapato andake dokopi mena kapua mendepale lapoma dolapopi
- 14:1-15:8 Panasiamo tata dupa
- 16:1-21 Gotenya imbu kaengeme pelesa kalange tumbiamo doko
- 17:1-20:10 Goteme Babilone koyasetala mena kapua mendepalepi, sambo potopesapi, Satanepi dupa ita minatana leamo doko

20:11-15 Goteme endakali dupa yapata

21:1–22:5 Goteme kaiti enengepi yuu enengepi Jetusaleme enengepi setata

22:6-21 Jisasa dee ipatana lao leamo dupa

1 ¹Jisasa^a Kataisame panasiamo dupa buku dakenya pepa pyapae silyamo. Opale yapa pipenge dupa Jisasame baanya kendemane dupa laitaka pina lao Goteme Jisasa-kisa setea-pyaa. Dopa piamopa Jisasame namba Jone baanya kendemane doko kateosa enjele mende epena leamo dokome panasia. ²Gotenya^b pii lapae dupapi, Jisasa Kataisame pii panao leamo dupapi, opale kandeo dupapi dupa pitaka nambame buku dakenya lao panokondape pilyo. ³Gotenya^c pii lapae dokonya ene pitana lapae silyamo dupa itaki pyatamo dokopi, sepala watao minatamino endakali dupapi, dupa mona yaepena. Doko, Goteme pitana lelyamo dupa pipenge gii doko tengesa petelyamo.

Joneme sosa kalange dutupa kandao auu pyoo kalyepape leamo doko

⁴Namba^d Joneme yuu Esia-tena sosa kalange kalyamino dutupanya pepa dake pyao peekelyo. Gote wamba waka kateamo, indupa kalyamo, ipanya pilyamo dokopi, baanya isoo petenge toko enomba dokonya sipitisa kalange katengema dupapi dutupame nyakama kandao mona epe mende palyetala nyakamanya mona doko lyuu lasekena. ⁵Dee^e pii tolao lao panenge akali Jisasa Kataisa baa wambakao malunya sakateamo mupa doko yuunya kiŋi dupanya Kamongo kalyamo dokome apata nyakama kandao mona epe mende palyetala nyakamanya mona doko lyuu lasekenaka.

Baame naima auu kayapala baanya taiyoko dokome naimanya koo dupanya mokao nyia-pyaa. ⁶Baame^f naima isoo katenge injisipumopa naima baanya Gote-kisa Takange dokonya kalai pyakamaingi pitisa joo kalyamano. Tii pipaepa pupu lapaepa dolapo tanga tangapi baa-kisaka sepengemo lamo. Kiniaka.

⁷Kandeleno!^g Baa kopa tambetambe ipata. Ipatamo doko endakali pitakame kandataminopa baa piamino dupame kandatamiaka. Yuunya endakali tata dupa pitakame baa kandatala ee lao etete yamataka latami. Pii dutupa etete kiningi.

^a 1:1 Dan 2:28-29,45; Pa 1:19, 22:6,16 ^b 1:2 Pa 1:9, 6:9, 19:10 ^c 1:3 Lu 11:28; 2 Ko 6:2; Pa 22:7,10 ^d 1:4 Eke 3:14-15; Ais 41:4; Pa 1:8, 3:1, 4:5,8, 5:6, 11:17, 16:5 ^e 1:5 Wee 89:27,37, 130:8; Ais 40:2, 55:4; Jo 18:37; Kl 3:18; 1 Jo 1:7, 4:10; Pa 3:14, 17:14, 19:16 ^f 1:6 Eke 19:6; Ais 61:6; Lo 16:27; 1 Pi 2:5,9; Pa 5:10, 20:6 ^g 1:7 Dan 7:13; Sak 12:10,14; Mt 24:30; Mk 13:26; Lu 21:27; Jo 19:34,37; 1 Te 4:11

⁸Kamongo^h Gote eteteaka pupu lapae wamba waka kateamo, indupa kalyamo, ipanya pilyamo dokome dapa lelyamo: “Tee pingipi etengepi doko nambakana,” lelyamo.

Joneme Jisasa kombeame kandeamo doko

⁹Nambaⁱ Jone nyakamanya kaiminingi doko nyakamapi nambapi naima Jisasapa pakatae katao, Goteme isipumopa, kenda pipae nyoo maka nakayao kyoto joo lautao kalyamano. Nambame Gotenya pii doko lamaiyopi, Jisasanya lao lao paneopi, tenge dolaponya namba watao piaminopa yuu Patamosa lenge solowata pete kainanya singi dokonya kateo. ¹⁰Sandee gii mendenya Oli Sipitisa dokome namba sakatasiamopa pii mende puu lao beto lee lao nambanya maitasakaita ipao lea. ¹¹Pii dokome lao pituu, “Embame kandeleno dupa pitaka buku mendenya pyapala, yuu Epesasapi, Semenapi, Pekemamapi, Tayataitapi, Satisapi, Pilatepiapi, Leotosiapi, sosa kalange dutupanya pyasakamaipi,” lea.

¹²Dokopa^j akali pii langiamo doko kanjanya namba kapilyetala kandeopa, lama kaiyepae setenge toko golome wasepae kalange sia. ¹³Dokopa^k Endakalinya Ikiningi doko endakali katele pyoo lama setenge toko kaina dokonya yonge pee londe mendeme baanya moko lengenya tuu lao petala, matapu golome wasepae mende baanya sangalnya petae kateo. ¹⁴Aiyomba^{l m} iti doko kyoo lao kopa kyoo lapaepi, pakenana timbokopaelepi jiamopa baanya lenge dolapo itate yuli jia. ¹⁵Baanyaⁿ moko kape dolapo kana botonja itate andakenya yangatae polepole pili pia. Baanya pii leamo doko endaki oo andake lee pia. ¹⁶Baame^o baanya kingi tolai-kaitame bui kalange minatae kateamopa konjua yangi nenge kata kata petae etete nenge katapae doko baanya nengekaita pyakaetae kateo. Baanya lengelyaapi doko tii pyoo kotaka niki tele pia.

¹⁷Dopa^p piamopa nambame baa kandatala baanya moko kateamo dosa etete kumapae joo lombapae sio. Dopaka doko, baame baanya kingi tolai-kaitame namba watandatala lao pituu, “Emba paka nakayape! Etete wambawapi etawapi doko namba. ¹⁸Namba^q lenge tao kalyo. Wamba kumapewaka doko indupa namba lenge tao etete katato kalyona kanda. Kumingi dokopa yuu koo dokopa dolapo nambame isingi. ¹⁹Dopana,^r wamba kanjeno dupapi, epapu pilyamo dupapi, dee maitakao pitamo dupapi dupa embame pepa pyape. ²⁰Nambanya^s kingi tolai-kaita bui kalange katapumu kanjeno dupapi, lama setenge toko golome wasepae

^h 1:8 Eke 3:14; Ais 41:4; Emo 3:13, 4:13; Pa 1:4, 4:8, 11:17, 15:3, 16:5,7,14, 19:6,16, 21:6,22, 22:13 ⁱ 1:9 Lo 5:3; 2 Ti 2:12; Pa 6:9 ^j 1:12 Pa 1:20 ^k 1:13 Ese 9:2,11; Dan 7:13, 10:5; Pa 1:20 ^l 1:14 Dan 7:9 ^m 1:14-15 Dan 10:6; Pa 2:18, 19:12 ⁿ 1:15 Ese 1:24, 43:2; Pa 14:2, 19:6 ^o 1:16 Eke 34:29; Ais 49:2; Ip 4:12; Pa 1:20, 2:1,12,16, 3:1, 19:15,21 ^p 1:17 Isi 13:20; Ais 44:2,6, 48:12; Dan 8:18, 10:15-19; Pa 2:8, 22:13 ^q 1:18 Ip 7:25; Pa 1:8 ^r 1:19 Ais 48:6; Dan 2:28-29; Apa 2:2; Pa 1:1, 22:6 ^s 1:20 Pa 1:12,16, 2:1, 3:1

kalange dupapi, dutupame kongali petae. Dutupanya tenge dapa: bui kalange dutupa, sosa kalange dutupanya enjele dutupa. Dee lama setenge toko kalange dutupa, sosa kalange dutupana,” lea.

Epesasa yuu dokonya pepa pyao pyasakamaipi leamo doko

2 ¹“Epesasa^t yuu dokonya sosanya enjele kalyamo dokonya dapa lao pepa pyao pyasakamaipi: ‘Nambanya kingi tolai-kaitame bui kalange minao, lama kaiyepae setenge toko golome wasepae kalange kainanya paenge dokome pii dake emba langilyo. ²Nambame^u embanya manapi, lekeleke tengepi, kyoto joo katengepi dutupa masilyo. Dopa pyoo katapala endakali koo dupa etete maka kaenge doko nambame masilyoaka. Endakali dupame naima aposele kalyamanona lengemaka doko, dupa aposele daa, sambo lengema lamo lao embame makande pyoo kandatee. ³Embame kyoto joo katao, maka nakayao, namba lao masetala kenda pipae nyoo kalyeno. ⁴Dopaka doko, emba-kisa tenge mende silyamo: wamba embame tee pyao namba auu kaenoli pyoo indupa auu nakaeleno. ⁵Dopana,^v wamba embame mana epe minino doko indupa lombapae soo kalyenona dee masepe. Wamba embame tee pyao mana mininoli pyoo dee mona kapilyetala mana doko minape. Daana lao mona kapilyetala nayateno kandao doko, nambame emba katatesa ipupala embanya lama setenge toko doko nyoo nepato. ⁶Dopaka^w doko, dee mende embame auu pilino doko dapa: embame akali Nikolasa watao miningi endakali dupanya mana dupa etete auu nakayapinopa nambame apata etete auu nakaelyoaka.

⁷“‘Sipitissime^x sosa dupa kandao pii lelyamo doko endakali kalekaita singi dokome sokondape pipenge.

“‘Koo dupa yanda pimaiyoo ita minatamo endakali dokome Gotenya Patandisa^y yuu dokonya lete katasingi ita dokonya dii lyao nena lato.’

Semena yuu dokonya pepa pyao pyasakamaipi leamo doko

⁸“Semena^z yuu dokonya sosanya enjele kalyamo dokonya dapa lao pepa pyao pyasakamaipi: ‘Etete wambawapi etawapi doko namba kumapala dee lenge tao katao pii dake emba langilyo. ⁹Emba^a kenda pipae dupa nyowapi etete daa jowapi kalyeno doko nambame masilyo. Dopaka doko, emba-kisa masoo miningi longo silyamo. Dee endakali mendapuame emba kilya kandelyamino doko nambame masilyoaka.

^t 2:1 Pa 1:12,16,20, 3:1 ^u 2:2 2 Ko 11:13,15; 1 Te 1:3; 1 Jo 4:1; Pa 2:19, 3:1,8,15
^v 2:5 Pa 2:16,22, 3:3,19 ^w 2:6 Wee 139:21 ^x 2:7 Pot 3:18; Ese 28:13, 31:8-9; Mt 13:9;
Pa 2:7,11,29, 3:6,13,22, 22:2,14,19 ^y 2.7 *patandisa* Juta dupame Gotenya kaiti yuu auu
pyoo katapenge enenge mende silyamona lao masetala kenge Patandisa lengema-pyaa.
^z 2:8 Ais 44:6, 48:12; Pa 1:17, 22:13 ^a 2:9 Lo 5:3; 2 Ko 11:14-15; 2 Ti 2:12; Je 2:5; Pa 3:9

Dupame nyakama Jutana lelyaminoaka doko, dupa Juta daa, Satane tata. ¹⁰Emba-kisa^b kenda pipae mende ipanya pilyamona, emba paka nakayape. Sataneme nyakama makande pyaanya nyakamanya endakali mendapua anjalanya pilyamona anjetamopa nyakamame kenda pipae dupa nyoo yuu gii kingi ita mendai katatami. Embame namba tungi pyao katawaka pao embanya kumingi gii doko kandao nyepe. Dopa pitinopa nambame emba lete etete katenge doko yole joo dito.

¹¹“ ‘Sipitisame^c sosa dupa kandao pii lelyamo doko endakali kalekaita singi dokome sokondape pipenge.

“ ‘Koo dupa yanda pimaiyoo ita minatamo endakali doko, lapo pyoo kumingi dokome baa koyasala nayata.’

Pekamama yuu dokonya pepa pyao pyasakamaipi leamo doko

¹²“Pekamama^d yuu dokonya sosanya enjele kalyamo dokonya dapa lao pepa pyao pyasakamaipi: ‘Namba konjua yangi nenge kata kata petae etete nenge katapae miningi dokome pii dake emba langilyo. ¹³Emba Satananya tenge joo isingi yuu dokonya kalyeno doko nambame masilyo. Dopaka doko, embame namba lao minokondape pingi. Nambanya pii tolao lao panenge akali Andipasa lenge nyakama-pipa awapa kateamino doko, nyakamanya yuu Satane katenge dokonya pyao kumasiami. Dopa piamino gii dokopapi embame namba maita dyaa nayaka. ¹⁴Dopaka^e doko, emba-kisa tenge kuki mende silyamo: embanya yuu doo tange mendapuame Belamenya mana pii dupa minokondape pilyamino. Belameme akali Beleke lenge doko mana lamaiyamopa, Belekeme Isataele endakali dupa koo pina lao mapisia-pyaa. Mapisiamopa Isataele dupame tunduma pingi sambo gote lao kundi maitae dupanya nao, kepo kolao piami-pyaa. ¹⁵Dopaka^f pyoo embanya yuu doo tangeaka mendapuame Nikolasanya mana pii dupa minokondape pilyaminoaka. ¹⁶Dopana^g emba mona kapilyepe. Daa tamo kandao, namba emba-kisa yapa ipupala nambanya nenge kaitanya konjua pyakaetae kalyamo dakeme endakali dupa yanda pimaito.

¹⁷“ ‘Sipitisame^h sosa dupa kandao pii lelyamo doko endakali kalekaita singi dokome sokondape pipenge.

“ ‘Koo dupa yanda pimaiyoo ita minatamo endakali doko kaitinya nee yalo petae dokonya nambame maitala, kana kyoo lapae mendenya kenge enenge mende pepa pyapae setamopa baa maitoaka. Dopa pitopa

^b 2:10 Dan 1:12,14; Mt 10:28; Lu 22:31-33; Jo 8:37-44; 1 Ko 9:25; 2 Ti 4:8; Je 1:12; Pa 3:9,11 ^c 2:11 Pa 2:7, 20:6,14, 21:8 ^d 2:12 Ais 49:2; Ip 4:12; Pa 1:16, 2:16, 19:15
^e 2:14 Nam 22:2,5,7, 25:1-2, 31:16; Dit 23:4; 1 Ko 8:10; 2 Pi 2:1,15; Ju 11 ^f 2:15 Pa 2:6
^g 2:16 Pa 1:16, 2:12, 3:11, 19:15, 22:7,12,20 ^h 2:17 Eke 16:4,14-15,33-34; Wee 78:24; Ais 62:2, 65:15; Jo 6:48-50; Pa 2:7, 3:12, 19:12

endakali mendaipi mendeme kenge doko nakandata. Kana doko nyetamo endakali dokome iki kandata.’

Tayataita yuu dokonya pepa pyao pyasakamaipi leamo doko

¹⁸“Tayataitaⁱ yuu dokonya sosanya enjele kalyamo dokonya dapa lao pepa pyao pyasakamaipi: ‘Namba Gotenya Ikiningi, nambanya lenge dolapo itate yuli jepae moko kape dolapo kana botonja joo polepole pingi dokome pii dake emba langilyo. ¹⁹Embame namba lao masoo minao, endakali dupa auu kayao, dupa nisoo, kyoto joo katao mana minilino dutupa nambame masilyo. Embame indupa mana epe minilino dutupame wambao mana miniino dutupa ita minilyamo. ²⁰Dopaka^j doko, embakisa tenge mende silyamo: embame enda Jesapele doko sosanya petena kaeleno. Dopa pipinopa enda dokome baa potopesana latala nambanya kendemane dupame kepo kolawapi, dee tunduma pingi sambo gote lao kundi maitae dupanya natamipi pina lao dupa minakasoo mana lamaingi. ²¹Nambame baa mona kapilyina lao yuu gii mendatupa petena kayo. Dopaka doko, baa mona kapilyala nayao baanya kepo kolenge mana doko maita maiya nayapuli lao masilyamo. ²²Dopana nambame enda doko-kisa yaina mende pena latala nyoo isa setato. Baa-pipa kepo kolao paelyamino akali dupa mona kapilyala nayatamino kandao doko, nambame kenda pipae andake mende dupa-kisa pena latoaka. ²³Baanya^k wane dupa apata kumina lao nambame pyao kumasoto. Dopa pitopa endakali dupa pitakanya ingi monapi dupa nambame kandokondape pingi lamo lao sosanya endakali kalyamino dupa pitakame kandatami. Dopana nyakama mendai mendai lao dupanya mana minatamili pyoo nambame yanu pyato.

²⁴“ ‘Dopaka^l doko, nyakama endakali yangi yuu Tayataita kalyamino dupame mana pii dake watao minala naelyamino. Satanenya mana watao miningi dupame mana angina lengema dokonya nyakamame mana nyala nayamiaka. Dopana nambame nyakama-kisa kenda pipae waka mende setala nayato lao langilyo. ²⁵Dopaka^m doko, nyakamame mana minilyamino dupa pitaka minokondape pyoo minao pao namba ipato gii dokonya tuu laapape. ²⁶Endakaliⁿ mendeme koo dupa yanda pimaiyoo ita minao baanya gii etatamo dokonya tuu lao nambanya mana watao minatamo doko, nambame baa yuu pitakanya endakali dupa isoo katena lato. ²⁷Baame aene kolyepe mende minao endaki sanima penge pyao tambele pyoo dupa isoo katata. ²⁸Namba^o nambanya Takangeme

ⁱ 2:18 Dan 10:6; Pa 1:14-15, 19:12 ^j 2:20 Nam 25:1-2; 1 Kiñ 16:31; 2 Kiñ 9:22,30; Pa 2:14

^k 2:23 Wee 7:9, 62:12; Pot 24:12; Jet 11:20, 17:20; Ap 1:24; Lo 2:6; 2 Ti 4:14; Pa 18:6, 20:12-13 ^l 2:24 Pa 3:8-11 ^m 2:25 Pa 3:11 ⁿ 2:26-27 Wee 2:8-9; Pa 12:5, 19:5,15

^o 2:28 Ais 14:12; 2 Pi 1:19; Pa 22:16

endakali dupa isoo katape leamoli pyoo, nambame endakali dokome isoo katena lato. Dee nambame baa yuu yongao bui katenge doko maitoaka.

²⁹“ ‘Sipitissime sosa dupa kandao pii lelyamo doko endakali kalekaita singi dokome sokondape pipenge.’

Satisa yuu dokonya pepa pyao pyasakamaipi leamo doko

3 ¹“Satisa^p yuu dokonya sosanya enjele kalyamo dokonya dapa lao pepa pyao pyasakamaipi: ‘Gotenya sipitisa kalange dutupa namba-kisa soo dee bui kalange dutupa namba-kisa katao pipumopa pii dake emba langilyo. Embanya mana dupa nambame masilyo. Endakali dupame emba kandao lenge tao kalyenona lelyaminoaka doko, kumapae mende kalyeno. ²Emba kandao katape. Embame mana miniino dupa nambanya Gotenya enombasa angi jiamo nakandeo. Tenge dokonya embanya mana dupa mee jalanya pilyamona, embame pupu lao minape. ³Dopa^q petala embame Wai Pii Epe sepala nyiino doko dee masetala mona kapilyoo minapeta kopo lape. Emba lenge tao kalya nayateno kandao doko, namba pake nenge endakali mende epengeli pyoo, embame naipapeno lao masete gii mendenya ipato. ⁴Dopaka^r doko, embanya endakali mendatupa Satisa yuu dokonya kalyamino dupame nyakamanya yonge pee dupa kaimala pisala nayami. Dupame epe joo katengema dokonya kapa pao yonge pee kyoo lapae dupa pyoo namba-pipa payatama. ⁵Koo^s dupa yanda pimaiyoo ita minatamo endakali dokonya nambame dopaka pyoo yonge pee kyoo lapae petakamaitala, endakali lete etete katenge dupanya kenge singi buku dokonya nambame baanya kenge kunanya nepakamaiya nayato. Nambame nambanya Takangepi Takanganya enjelepi, dupanya enombanya baa nambanyana lao lao panato.

⁶“ ‘Sipitissime sosa dupa kandao pii lelyamo doko endakali kalekaita singi dokome sokondape pipenge.’

Pilatepia yuu dokonya pepa pyao pyasakamaipi leamo doko

⁷“Pilatepia^t yuu dokonya sosanya enjele kalyamo dokonya dapa lao pepa pyao pyasakamaipi: ‘Namba etete epe angi dokona, Dapitimi kii miniamo doko nambame minao kaitini lumbanya setelyo doko dee endakali mendeme kapa pao pai laa naengema. Pai lelyo doko dee endakali mendeme lumbala naengema akali dokome pii dake emba langilyo. ⁸Embanya^u mana dupa nambame masilyo. Nambame embanya

^p **3:1** 1 Ti 5:6; Pa 1:4,16,20, 2:1-2, 3:8,15, 4:5, 5:6 ^q **3:3** Mt 24:42-44; Mk 13:33; Lu 12:39-40; 1 Te 5:2,4; 2 Pi 3:10; Pa 2:5,16,22, 3:19; 16:15 ^r **3:4** Ju 23; Pa 7:14
^s **3:5** Eke 32:32-33; Wee 69:28; Dan 12:1; Mt 10:32; Lu 9:26, 10:20, 12:8; Pl 4:3; Pa 2:7, 3:18, 4:4, 6:11, 7:9,13, 13:8, 17:8, 19:14, 20:12,15, 21:27 ^t **3:7** Jop 12:14; Ais 22:22
^u **3:8** 1 Ko 16:9; Pa 2:2, 3:1,15

enombasa kaitini lumbapelyo doko mendeme kapa pao pai laa nayata. Emba-kisa pupu lapae kuki silyamo dokopi, nambanya pii minapeta kopo leeno dokopi, namba maita dyaa nayeno dokopi dutupa namba masilyo. ⁹Satane^v tata dupame naima Jutana lelyaminoaka doko, dupa Juta daana, sambo lelyamino. Dopana sepe. Nambame dupa embanya enombasa ipao moko katate dosa luma lakapala emba lao tama pina latopa, nambame emba auu kaenge lamo lao kandatami. ¹⁰Embame^w nambanya pii doko watao minao kyoto joo kateeno tenge dokonya nambame emba isotopa, makande pingi dokome yuu dupa pitakanya endakali dupa makande pyaanya ipatamo doko emba-kisa naipata. ¹¹Namba^x yapa ipatona, embame embanya yole doko aopyoo latala mendeme nyoo nepakatana nambanya piipi manapi opale emba-kisa silyamo dupa etete kyoto joo minape. ¹²Koo^y dupa yanda pimaiyoo ita minatamo endakali doko nambame nambanya Gotenya losuu andaka panda etete epe dokonya pingina joo katasotopa, baa dee kamaka paa nayata. Nambame nambanya kenge enengepi, nambanya Gotenya kengepi, nambanya Gotenya yuu taono dokonya kengepi dutupa baa-kisa pepa pyato. Yuu taono doko Jetusaleme enenge nambanya Goteme kaiti-kisa katao pyandatamo doko.

¹³“ ‘Sipitisame^z sosa dupa kandao pii lelyamo doko endakali kalekaita singi dokome sokondape pipenge.’

Leotosia yuu dokonya pepa pyao pyasakamaipi leamo doko

¹⁴“Leotosia^a yuu dokonya sosanya enjele kalyamo dokonya dapa lao pepa pyao pyasakamaipi: ‘Namba kenge Kiniaka lenge Gotenya pii tolao lao panenge akali angi dokona, Goteme wapuiyamo dupanya tenge dokome pii dake emba langilyo. ¹⁵Embanya^b mana dupa nambame masilyo. Emba endaki itaita napingi kii nala naengeaka jepae doko, itaita pipae tamopi kii napae tamopi mende pyali kandao doko, yaka jipyali. ¹⁶Dopaka doko, emba endaki kulapae jepala itaita pipaepi kii napaepi mende nanjilino dokonya nambame emba endaki joo mungunya nepawani kaelyo. ¹⁷Embame^c dapa lenge: ‘Namba muni longo sipumopa oapi longo setao kalyona, mendita mende daa nanjilyamo,’ lenge. Dopa lengeaka doko, emba koyao kalyeno dokopi, endakalimi kondo kayapenge dokopi, daa joo kalyeno dokopi, papata joo kalyeno dokopi, lenge koo joo kalyeno dokopi dutupa emba tangeme masala naeleno.

^v 3:9 Ais 43:4, 45:14, 49:23, 60:14; 2 Ko 11:14,15; Pa 2:9 ^w 3:10 Lu 21:19; 2 Ti 2:12; 2 Pi 2:9 ^x 3:11 1 Ko 9:24-27; 2 Ko 6:2; Pa 2:10,16,25, 22:7,12,20 ^y 3:12 Ais 62:2, 65:15; Ese 48:35; Ga 2:9; 1 Ti 3:15; Pa 2:17, 14:1, 21:2, 22:4 ^z 3:13 Pa 2:7 ^a 3:14 Pot 8:22; Jo 1:1-3; Kl 1:15; Pa 1:5, 19:11 ^b 3:15 Lo 12:11; Pa 2:2, 3:1,8 ^c 3:17 Pot 13:7; Osi 7:9, 12:8; Lu 12:21; 1 Ko 4:8

¹⁸Dopa^d pyoo katapinosa nambame mana datupa emba langilyo: emba-kisa oapi longo sinalena golo kana itateme yangao auu pisetae doko namba-kisa sambape. Embanya yonge doko sanga pyatae katao elya nakayatalena yonge pee kyoo lapae mende sambape. Embanya lenge dolaponya matasini katatenopa auu pyoo tatalena lenge matasini mende apata sambapeaka. ¹⁹Nambame^e endakali auu kaelyo dupa pyalanya latala, dupanya mana dupa nambame tolasingi. Dopana embame mona mendai paliuu mona kapilyepe. ²⁰Namba^f anda kambusa pii-pii lao kalyo kanda! Endakali mendeme namba lumu lao sepala ipu latamo kandao doko, namba andaka kolandatala baapa nalimba tange awapa pituu nee natamba. ²¹Wamba^g nambame koo dupa yanda pimaiyoo ita minatala nambanya Takangepa kamongao kalyambanoli pyoo koo dupa yanda pimaiyoo ita minatamo endakali doko, nambapa kamongao katatambana opena lato.

²² “Sipitissime^h sosa dupa kandao pii lelyamo doko endakali kalekaita singi dokome sokondape pipengena,” lao endakali katele piamo dokome lea.

Kaitinya Gote lao lalyingi doko

4 ¹Deeⁱ maitakao kandeopa kaitinya kaitini mende lumbapae sia. Wamba baame pii beto lee lao leamo sioliaka pyoo dee lao pituu, “Maitakao pipenge dupa nambame emba laitaka pitoo, ketae ipu,” lea. ²Dokopa^j Oli Sipitisa dokome pupae lao namba sakatasiamopa, kaiti dokonya kiŋi petenge toko mende siamo dokonya mende peteamo kandeo. ³Kandeopa^k peteamo doko kana etete epe kamalawai pyapae jasapaa kanapi, kate pyapae kaniliane kanapi jia. Dee lipakepa mendeme kiŋi petenge toko doko kakopatae kateamo doko sakapae emetele kana jia. ⁴Petenge^l toko kingi ita lapoma-kisa dee kitomendeme kiŋi petenge toko doko kakopatae kateamopa dutupanya isingi akali kingi ita lapoma-kisa dee kitomendeaka peteami. Isingi akali dutupa yonge pee kyoo lapae mendapua petala, aiyomba dupanya golome wasepae balu dupa manditae peteami. ⁵Kiŋi^m petenge toko dokonya yuu wapaka pyoo mulumalu latala kaiti katea. Toko dokonya enombatena kia kalange tao katea. Dutupa Gotenya sipitisa kalange dutupa. ⁶Kiŋiⁿ o petenge toko enombatena mendita mende siamo doko solowata pete mende galasa yangi piti napingi jepae mende sia.

^d 3:18 Ais 55:1; Je 2:5; Pa 3:5, 4:4, 16:15 ^e 3:19 Pot 3:12; 1 Ko 11:32; Ip 12:4-11; Pa 2:5,16,22, 3:3 ^f 3:20 Jo 14:23; 1 Jo 2:24 ^g 3:21 Mt 19:28; Lu 22:29-30; Pa 1:6, 20:4
^h 3:22 Pa 2:7 ⁱ 4:1 Eke 19:24; Dan 2:28-29; Pa 1:1,10,19 ^j 4:2 1 Kiŋ 22:19; 2 Ktl 18:18; Ais 6:1; Ese 1:26, 10:1; Pa 4:9, 5:1,7,13, 6:16, 7:10,15, 19:4, 21:5 ^k 4:3 Jen 9:12-17; Eke 24:10; Ese 1:28 ^l 4:4 Ais 24:23; Pa 3:5 ^m 4:5 Eke 19:16; Ese 1:13; Sak 4:2; Pa 1:4, 5:6, 8:5 ⁿ 4:6 Eke 24:10; Ese 1:18,22 ^o 4:6-7 Ese 1:5-10, 10:14

Dokopa isingi akali dupame katao kakopatae kateamino kaina dokonya opale lenge tenge kitomendeme kiŋi petenge toko doko kaina-kaina petae kateami. Dutupanya enombatenapi maitakaitapi dupanya lenge longo tengema-pyaa. ⁷Opale lenge tenge dutupanya wambao doko mena layone^pjepae. Lapo doko mena pulumakao yakane jepae. Tepo doko endakali lengelyaapi katenge. Kitomende doko yaka lakepame pee lao paenge dopale jepae. ⁸Dutupa^q mendai mendai lawanya papa tokange lao kalyamopa, yongepi papa pundipundipi dupanya lenge longo tengema-pyaa. Dutupame kuka kotakapi imambu nala nayao dapa lengema-pyaa:

“Kamongo Gote eteteaka pupu lapae, baa etete epe, etete epe, eteteaka epe.

Baa wamba waka kateamo, indupa kalyamo, ipanya pilyamo dokona,” lengema-pyaa.

⁹⁻¹¹Opale^{r s t} lenge tenge kitomende dutupame lete etete katawaka katenge kiŋi petenge toko dokonya petenge doko kandao lalyoo andanda semaiyoo yaka pilino lengema-pyaa. Dopa pilyamili pyoo isingi akali kingi ita lapoma-kisa dee kitomende dutupame kiŋi petenge tokonya petenge dokonya enombatena tombauli sepala lete etete katawaka katenge doko lao tama pyoo nyakamanya balu golome wasepae dupa kiŋi petenge toko dokonya enombasa pukuoo pyasetala lao pituu,

“Naimanya Kamongo Gote embame oapi dupa pitaka wapuii.

Dupa pitaka embanya masingi dokome wapuopae silyamo.

Tenge dokonya minao embame kapa pao tii pipaepi,

pupu lapaepi dupa nyoo kenge soo katapengena,” lengema-pyaa.

Joneme buku mendepa Sipisipi Yakane mendepa kandeamo doko

5 ¹Kiŋi^u petenge toko dokonya petenge dokome kingi tolai-kaitame buku mende minia. Buku dokonya panda nasoo yangi yangipi lapotanya pepa pyatae katea. Buku yaki pingi kende kalangeme buku doko yaki petae kateamopa, kende lyolo dutupa maa minao wakaiya katatae katea. ²Dokopa enjele pupu lapae mendeme puu lao lao pituu, “Akali epe apimi kapa pao wakaiya dupa taka latala buku doko lyangenape?” lea. ³Dopa^v leamopa kaitipi, yuupi, yuu kokopi, dupanya buku doko lyangao kandapenge mende nakatea. ⁴Buku doko kapa pao lyangapengepi kandapengepi epe mende kutao kayaminosa namba ee lao yamataka leo. ⁵Isingi^w akali dupanya mendeme namba langyoo,

^p 4.7 *layone* Layone doko pusii jepae andake mendeme endakalipi pulumakawapi pyoo kumasingi. ^q 4:8 Ais 6:2-3; Ese 1:18, 10:12; Pa 1:4,8 ^r 4:9 Dan 4:34, 6:26, 12:7; Pa 4:2 ^s 4:10 Dan 4:34; Pa 4:2, 20:6, 22:5 ^t 4:11 Lo 4:17; Pa 14:7 ^u 5:1 Ais 29:11; Ese 2:9-10; Dan 12:4,9; Pa 4:2 ^v 5:3 Pa 5:13 ^w 5:5 Jen 49:9; Ais 11:1,10; Lu 7:13; Lo 15:12; Ip 7:14; Pa 22:16

“Jutamanya mena layone^xjepae mende Dapiti tatanya mandipae dokome wakaiya kalange dutupa taka latala buku doko lyangalanya yanda pyoo ita minateana, emba ee kaya,” lea.

⁶Dokopa^y Sipisipi Yakane pyao kumasiamino dopale mende opale lenge tenge kitomende dutupapi, isingi akalipi dutupanya kainanya kiñi petenge toko tengesa dosa katea. Baa aiyombanya nenge kalange kalyamopa lenge kalangeaka tenge-pyaa. Lenge dutupa Gotenya sipitisa kalange dutupa Goteme yuu dupa pitakanya kalya pena lea-pyaa. ⁷Kiñi^z petenge toko dokonya petenge doko peteamo dokonya kingi tolæ-kaita buku siamo doko Sipisipi Yakane dokome pao nyia. ⁸Nyepeamopa,^a opale lenge tenge kitomende dutupapi, isingi akali kingi ita lapoma-kisa dee kitomende dutupapi dutupame Sipisipi Yakane dokonya enombasa tombauli siami. Dopa pyoo pituu, isingi akali dupame gitaa jepae mendapua menda menda minao pituu, pelesa golome wasepae dupanya ita kena tunduma pina lao yangenge dupame tumbatae mendapua miniamiaka. Kena tunduma pina lao yangenge miniamino dokome Gotenya endakali dupame baa lao loma singima doko makande petae. ⁹Dupame^b wee enenge mende dapa lao leami:

“Emba epe dokome kapa pao wakaiya dupa taka latala buku doko lyangapenge jilyamo.

Doko, endakalimi emba taiyoko nyiamino dokome endakali dupa Gotenya kii tamao nyakamarii.

Endakali pii wakale wakale lengepi, yonge waka waka katengepi, yuu dupa pitakanya endakali tata dupa pitakapi dupa kii tamao nyakamarii.

¹⁰Dupa^c Goteme isoo katena latala baanya kalai pyakamaingi pitisa katena lee.

Dupame yuunya endakali dupa isoo katatami leena,” lao wee leami.

¹¹Dokopa^d enjele eteteaka etete longo paka dupame kiñi petenge toko dokopi, opale lenge tengepi, isingi akalipi dupa katao kakopeamino doko lengeme kandao pii leamino dupa kaleme soo pio. ¹²Dupame^e puu lao dapa leami:

“Sipisipi Yakane dake wamba pyao kumasiami.

Baa epe dokome pupu lapaepi, oapi etete longo dupapi, etete masokondape pingi manapi, kyoto joo katengepi, andanda semaingipi, tii pipaepi, tama pingipi dupa kapa pao nyepengena,” leami.

^x 5:5 *layone* Juta dupame Kataisanya pupu lapae dupa masetala kenge layone leami-pyaa. Doko naimame endakali mende kandao laima lenge dopale joo leami-pyaa.

^y 5:6 Ais 53:7; Sak 4:10; Jo 1:29,36; Pa 1:4, 4:5, 13:8 ^z 5:7 Pa 4:2,10 ^a 5:8 Wee 141:2; Pa 8:3-4, 14:2, 15:2 ^b 5:9 Wee 33:3, 40:3, 96:1, 98:1, 144:9, 149:1; Ais 42:10; Pa 14:3-4 ^c 5:10 Eke 19:6; Ais 61:6; 1 Pi 2:5,9; Pa 1:6, 20:4,6, 22:5 ^d 5:11 Dan 7:10; Ip 12:22; Ju 14-15 ^e 5:12 1 Ktl 29:11; Ais 53:7; Dan 2:20; Jo 1:29,36; Pl 2:7-9; Pa 5:6, 13:8

¹³ Goteme^f wapuiyamo kaitinya katenge dupapi, yuunya katenge dupapi, yuu koko palenge dupapi, solowata petenya singi dupapi, mendita mende soo pelyamo doko pitakame dapa leami:

“Tama pingipi, andanda semaingipi, tii pipaepi, kyoto joo katengepi dapa kiñi petenge toko dokonya petenge dokopa Sipisipi Yakane dokopa dolapo-kisa tanga tangapi soaka penana,” leami.

¹⁴ Dokopa opale lenge tenge kitomende dutupame “Kapana,” leaminopa isingi akali dupame isa tombauli sepala dolapo lao tama piami.

**Sipisipi Yakane dokome wakaiya kalange
dutupanya tokange taka leamo doko**

6 ¹ Sipisipi^g Yakane dokome wakaiya kalange dutupanya wambao doko taka leamopa, opale lenge tenge kitomende dutupanya mendeme kaiti katele lao, “Mende pena,” lea. ² Dopa^h leamopa mena osa kyoo lapae mende nambame kanju pio. Dokonya akali yanda miningi mende yanda pyoo ita minatala balu mandenge mende manditae petea. Baa yanda pyoo ita miningi akali dokome yanda pyoo ita minalanya pea.

³ Dokopa Sipisipi Yakane dokome wakaiya laponge doko taka leamopa opale lenge tenge laponge dokome, “Mende pena,” lea. ⁴ Dopaⁱ leamopa mena osa waka kangyoo mende peamo dokonya akali mende petea. Akali dokome yuunya endakali dupanya epe yuu yongena lao katenge mana doko nyoo nepatala endakali yango pyao kumasoloo pingi mana doko sakatasina lao mendeme baa pupu lasetala konjua andake mende maiya.

⁵ Dokopa^j Sipisipi Yakane dokome wakaiya teponge doko taka leamopa opale lenge tenge teponge dokome, “Mende pena,” lea. Dopa leamopa mena osa pumbuti mende kanju pio. Dokonya peteamo akali dokome sekele mende minia. ⁶ Dokopa^k opale lenge tenge kitomende dutupanya kainanya piili mende leamo dokome dapa lea: “Mendeme kapo penge mendainya wiisa dii muni kina mendaimi sambapenge. Dee kapo penge tepomanya bali dii dapa muni kina mendaimiaka sambapenge. Dopaka doko, embame olipi ipangepi waenepi dapa koyasala nayapengena,” lea.

⁷ Dokopa Sipisipi Yakane dokome wakaiya kitomende doko taka leamopa opale lenge tenge kitomende dokome, “Mende pena,” lea. ⁸ Dopa^l leamopa mena osa lyatapae mende kanju pio. Dokonya akali kenge Kumingi lenge doko pituu peamopa Geana lenge dokome baa watao pea. Dopa piamopa yuunya endakali dapa pitaka kitomende pyoo lita petala kitomende doko dolapome konjuapi, nee lopopi, yaina tatapi, mena kapua tatapi dupame kumaseta pina lao mendeme dolapo pupu lasia.

^f 5:13 Wee 150:6; Ju 25; Pa 4:2,10, 5:3 ^g 6:1 Pa 4:6, 5:1 ^h 6:2 Sak 1:8-10, 6:1-6; Pa 19:11

ⁱ 6:4 Ese 21:14-16; Sak 1:8, 6:2 ^j 6:5 Sak 6:2,6 ^k 6:6 Lep 26:26; 2 Kiñ 6:25; Ese 4:16-17

^l 6:8 Jet 14:12, 15:1-3; Ese 5:12,17, 14:21, 33:27; Osi 13:14

⁹Dokopa^m Sipisipi Yakane dokome wakaiya yuungi doko taka leamopa, endakali kumapae imambu mendapua kandeo. Endakali dupame Gotenya pii lapae doko lamaiyoo, Jisasame pii leamo doko minao piaminosa pyao kumasetae dupanya imambu dupa olata toko pundipundi dokonya peteami. ¹⁰Imambuⁿ dupame puu lao lao pituu, “Kamongo, emba etete epe-kisa angi baa dokome gii akipate patatamopa yuunya endakali dupame naima taiyoko nyiamino dupa yapapala yanu nyakatepe?” leami. ¹¹Dopa^o leaminopa, mendeme yonge pee kyoo lapae londe dupa mendai mendai lao dokaita maiyamo nyiami. Nyepeaminopa mendeme okaita lamaiyoo, “Nyakama pyao kumasiaminoliaka pyoo nyakamanya masoo miningi kaiminingipi kalai mendai pingi endakalipi dupa pyao kumasoo etasetena, nyakama gii kuki mende imambu nyoo malisetalapa,” lea.

¹²Dokopa^p Sipisipi Yakane dokome wakaiya tokange doko taka leamo kanju piopa, titiwali andake mende minia. Dopa piamopa niki doko pumbutao iki ita kondapae jiamopa kana doko aluo taiyoko pia. ¹³Dopa^q piamopa ita lepa dii saka dupa poo andakeme kondao isa epengeli pyoo, kaitinya bui dupa kondao isa epea. ¹⁴Kaiti^r doko kaki pyoo tuli yangao lakele petala alu pia. Dokopa yuu manda dupa pitakapi, endaki kainanya yuu singi dupa pitakapi, dupanya singi panda dupa yakinatala, yukuoo puma puma piami. ¹⁵Yuunya^s kiñipi, kenge singi akalipi, yanda singi amii isingi akali mupapi, kamongopi, akali pupu lapae singipi, dee kendemane endakali dupa pitakapi, mee endakali dupa pitakapi dupa yuu manda dupanya kanandapi kana pundipundipi dupanya pao yalo pyaa pyaa peami. ¹⁶Dopa^t petala dupame yuu mandapi kanapi dupa lamaiyoo, “Kiñi petenge toko dokonya petenge dokome naima nakandawapi Sipisipi Yakane dokome naima imbu nakayawapi pinalena nyakama longapala naima sanga pyalapa! ¹⁷Doko,^u dolaponya imbu kaenge gii andake doko ipatelyamona, apimi kapa pao toya katapengepe?” leami.

Gotenya kongali petae endakali kateamino dupa

7 ¹Dutupa^v piamo kandateopa dee enjele kitomendeme yuu pitakanya yangi yangipi denge kitomende dutupanya katapala, yuupi, solowata petepi, ita mendaipi mende popotaumi poo laa naena lao kaitini lyokatae kateami. ²⁻³Dee^w enjele mendeme Gote lete katenge dokonya kongali pingi doko minao niki pyakaengesa-kaita lalyoo epea. Iupuala baame

^m 6:9 Pa 8:3, 14:18, 16:7, 19:2 ⁿ 6:10 Jen 4:10; Dit 32:43; 2 Kiñ 9:7; Jop 16:18, 24:12; Wee 79:5,10; Sak 1:12-13; Lu 18:7; Pa 16:7, 19:2 ^o 6:11 Pa 3:5,18, 7:9,13, 19:2,14

^p 6:12 Ais 13:10; Ese 32:7-8; Joe 2:10,31, 3:15; Mt 24:29; Mk 13:24-25; Lu 21:25; Ap 2:20; Pa 8:12, 11:13, 16:18 ^q 6:13-14 Ais 34:4 ^r 6:14 Pa 16:20, 20:11 ^s 6:15 Ais 2:10,19,21

^t 6:16 Osi 10:8; Lu 23:30; Pa 4:2,10 ^u 6:17 Joe 2:11,31; Nea 1:6; Mal 3:2; Lo 1:18; 1 Ko 1:8 ^v 7:1 Jet 49:36; Ese 37:9; Dan 7:2; Sak 6:5; Mt 24:31 ^w 7:3 Ais 44:5; Ese 9:4,6; Pa 3:12, 9:4, 13:16, 22:4

enjele kitomende yuupi solowata petepi dupa koyasina lao pupu lapae maitae kateamino dutupa kandao puu lao lamaiyoo, “Naimame naimanya Gotenya kendemane dupanya langalunya kongali petamana, nyakamame yuupi, solowata petepi, itapi dupa wambao koyasetala nayalapape,” lea. ⁴Gotenya^x kongali petae endakali Isataele tata dupa pitakanya itaki yaki doko taosene kingi itaka kingi ita mende-kisa dee kingi ita kitomende wakao kitomendeaka dupa kongali petae kalyaminona leamino sio. ⁵⁻⁸Akali Juta tatapi, Lupene tatapi, Gate tatapi, Asa tatapi, Napatalai tatapi, Manasa tatapi, Simione tatapi, Lipai tatapi, Isaka tatapi, Sepyulane tatapi, Josepe tatapi, Benjamene tatapi, tata dutupanya taosene kingi ita mende-kisa dee lapoma lawaka kongali petae kateami.

Gote lao lalyiamino doko

⁹Doko^y ^zkandatala endakali kambu andake mende pyatae kateamo doko kandeopa, endakali mendeme kapa pao itaki napyapenge jia. Kambu piamino doko endakali yonge waka waka katengepi, pii wakale wakale lengepi, yuu dupa pitakanya endakali tata dupa pitakapi, dupa kinji petenge toko enombapa Sipisipi Yakane dokonya enombapa dolaponya kambu pyatae kateami. Dupame yonge pee kyoo lapae londe dupa pyoo ita pame lenge dokonya yoko dupa minatae kateami. ¹⁰Dupame^a puu lao lao pituu, “Naimanya Gote kinji petenge toko dokonya petenge dokopa Sipisipi Yakane dokopame naima pyoo nyingimbana,” leami. ¹¹⁻¹²Dokopa^b enjele dupa pitakame kinji petenge toko dokopi, isingi akalipi, opale lenge tenge kitomende dutupapi dupa kakopao kinji petenge toko dokonya enombasa tombauli sepala Gote tama pyoo dapa leami: “Kiningi etete, tama pingipi, tii pipaepi, etete masokondape pingi manapi, yaka pilino lengepi, andanda semaingipi, pupu lapaepi, kyoto joo katengepi dutupa tanga tangapi naimanya Gote doko-kisa soaka pena. Kiniaka,” leami.

Dupanya kenda pipae eteamo doko

¹³Isingi^c akali dupanya mendeme namba pisoo, “Yonge pee kyoo lapae londe pingi dupa apinipi? Anja katao epeamipi?” lea. ¹⁴Nambame^d baanya pii yanu pyakamaiyoo, “Nambanya akali andake, embameaka masilinona,” leo. Dopa leopa baame namba langyoo, “Dokaitame kenda pipae andake dupa nyoo katapala Sipisipi Yakane dokonya taiyoko dokome nyakamanya yonge pee londe dupa kaimbu piaminopa, yonge pee dupa kyoo lea. ¹⁵Tenge^e dokonya minao Gotenya isoo petenge toko

^x 7:4 Pa 14:1-3 ^y 7:9 Jen 15:5; Dan 3:4; Jo 12:13; Pa 3:5,18, 15:2-5 ^z 7:9-12 Pa 15:2-5

^a 7:10 Pa 4:2,10 ^b 7:12 Pa 5:12, 11:17 ^c 7:13 Pa 3:5,18 ^d 7:14 Dan 12:1; Mt 24:21; Mk 13:19; Pa 1:5, 3:4, 22:14 ^e 7:15 Pa 4:2,10

dokonya enombasa katao kuka kotakapi baanya losuu anda etete epe dokonya baa lao lalyingima. Kiŋi petenge toko dokonya petenge dokome dupa-pipa awapa katao dokaitanya konambi joo katata. ¹⁶Dopa^f pitamopa dupa dee lopopi endaki nanupi nakayatami. Dee nikiŋi, itaita andake mendemepi dupa yangala nayataka. ¹⁷Doko,^g Sipisipi Yakane dokome Gotenya panda dokonya katapala dupa isoo laminao pao yalipa endaki lee kuingi dokonya tuu lata. Dopa pitamopa Goteme dupanya ee ipange dupa pitaka kunanya nepakamaitakana,” lea.

Sipisipi Yakane dokome wakaiya kalange doko taka lea

8 ¹Sipisipi^h Yakane dokome wakaiya kalange doko taka leamopa gii kuki mende kaitinya piipi keke kakipi mende nalea. ²Dokopa enjele kalange Gotenya enombanya katenge dupa kandeopa, mendeme dutupa beto kalange maiya.

³Deeⁱ enjele mendeme ipao olata toko dokopa kopao katapala pelesa golome wasepae mende ita kena tunduma pina lao setapala yangenge doko minatae katea. Ita kena tunduma pina lao yangenge longo dupa-pipa Gotenya endakali dupa pitakanya loma singima dupa-pipa dupa olata toko golome wasepae kiŋi petenge toko enombasa katenge dokonya pyasoo mendenya pali pali pina lao, ita kena tunduma pina lao yangenge dupa mendeme baa maiya. ⁴Kena tunduma dokopa Gotenya endakali dupanya loma singi dokopa dolapo enjele dokonya kinginya soo ketae Gote-kisa pea. ⁵Dokopa^j enjele dokome ita kena tunduma pina lao yangenge pelesa doko nyepala olata toko dokonya itate lopao nyoo pelesa dokonya tumbasetala itate doko isa yuunya pyale lea. Dopa piamopa yuu wapaka pyoo, kaiti katao, mulumalu lao, titiwali minao pia.

Enjele kitomendeme beto leamino doko

⁶Enjele^{k l} kalangeme beto kalange minatae kateamino dutupame beto laanya depa leami.

⁷Dokopa^m enjele wambao dokome baanya beto doko leamopa, tandake kapapa itatepa dolapo taiyoko-pipa pyasilya pyasena petala isa pyandea. Dopa piamo dokome yuu pitaka tepoma pyoo lita petala teponge doko tao etao, ita pitaka tepoma pyoo lita petala teponge doko tao etao, kaka yokopi saka dupa pitaka tao etawaka pia.

⁸Enjeleⁿ laponge dokome baanya beto doko leamopa, mendeme yuu manda andake jepae ita tapeta mende solowata pete dokonya pyale lea. Dopa piamo

^f 7:16 Wee 121:6; Ais 4:5-6, 25:4, 49:10 ^g 7:17 Wee 23:1-2; Ais 25:8, 49:10; Ese 34:23; Jo 10:11,14; Pa 5:6, 21:3-4 ^h 8:1 Apa 2:20; Sep 1:7 ⁱ 8:3 Eke 30:1-3; Wee 141:2; Emo 9:1; Pa 5:8, 8:4 ^j 8:5 Eke 19:16-19; Lep 16:12; Wee 11:6; Ese 10:2; Pa 4:5, 11:19, 16:18 ^k 8:6 Joe 2:1 ^l 8:6-13 Pa 16:1-9 ^m 8:7 Eke 9:23-26; Ese 38:22; Joe 2:30
ⁿ 8:8 Eke 7:20-21; Jet 51:25

dokome solowata pete pitaka tepoma pyoo lita petala teponge doko taiyoko pete jia. ⁹Dee opale lenge tenge Goteme wasepae solowata petenya koko singi pitaka tepoma pyoo lita petala teponge doko kumao etea. Sipi dupa pitaka tepoma pyoo lita petala teponge doko koyaka.

¹⁰Dokopa^o enjele teponge dokome baanya beto doko leamopa, bui andake kia kaiyepaele mende kaiti-kisa katao endaki lee kuingipi, andakepi dupa pitaka tepoma pyoo lita petala teponge dokonya pao kopo lea. ¹¹Bui^p dokonya kenge Kaa Pipae lenge dokome endaki dupa pitaka tepo pyoo lita petala teponge doko kaa pisia. Endaki doko kaa pipae dokonyana endakali longome napala kumiami.

¹²Dokopa^q enjele kitomende dokome baanya beto doko leamopa, nikipa kanapa dolapo tepoma pyoo lita petala teponge doko koyamopa, dee bui dupa pitaka tepo pyoo lita petala teponge doko koyao iminjia. Dopa piamopa yuu gii dupanya niki lenge doko kumba natala tii pyaakao napyoo kuka kanapi buipi dupa dopaka pyoo kumba nea.

¹³Dokopa^r yaka lakepame mende kaitipa kopao pee lao payamo dokome puu lao lao pituu, “Anematupa! Dee enjele tepomame beto laanya pilyaminona, yuunya endakali dupa etete koyatami, eteteaka koyatami iki lamo,” lea.

Enjele yuungi dokome beto leamo doko

9 ¹Dokopa^s enjele yuungi dokome baanya beto doko leamopa, kaitinya bui mende kondao isa yuunya kopo lea. Dopa piamopa yuli koo etete koko dokonya kii doko mendeme bui doko maiya. ²Bui^t dokome yuli dokonya kambu doko lumbapeamopa kena piamo doko ita andake tao kena pili pia. Dopa piamo dokome popotau doko kaita lyokao, niki tii doko sanga pyao iminjisia. ³Dokopa^u pauyombo mendapua kena kayapala isa yuunya mangeami. Mangeaminopa kanopato salenda dupa pupu lengemali pina lao mendeme pauyombo dupa pupu lasia. ⁴Dokopa^v mendeme dupa lamaiyoo, “Nyakamame ita tamopi, tanu tamopi, yuunya oo menda mendapi pyakalyingi dupa pitaka tamopi dupanya mende koyasala nayalapape. Dopaka doko, endakali langalu dupanya Gotenya kongali petae nakatenge dupa iki koyasalapape. ⁵Nyakamame dupa tanda maiyoo kana yuungi katatamiaka doko, pyao kumasala nayalapape,” lea. Pauyombo dupame endakali nelyamopa kanopato salendame pyapae tanda pili pingi. ⁶Kana^w yuungi dutupanya endakali dupa kumamuali lao masetamiaka doko, kumala nayatami. Kiningi etete, kumawani kayatamiaka doko kumingi doko dupa-kisa naipata.

^o 8:10 Ais 14:12 ^p 8:11 Jet 9:15 ^q 8:12 Eke 10:21-23; Ais 13:10; Ese 32:7-8;
 Joe 2:10,31, 3:15; Mt 24:29; Mk 13:24-25; Lu 21:25; Pa 6:12-13 ^r 8:13 Ese 7:5,26;
 Pa 9:21, 11:14 ^s 9:1 Ais 14:12; Lu 10:18; Pa 20:1 ^t 9:2 Jen 19:28; Eke 19:18; Joe 2:2,10
^u 9:3 Eke 10:12-15 ^v 9:4 Ese 9:4; Pa 7:3 ^w 9:6 Jop 3:21; Jet 8:3; Lu 23:30; Pa 6:16

⁷Nambame^x pauyombo dupa kandeopa, yanda pyaanya mena osa dupa depa latae katengemali piami. Dokaitame balu golome wasepaele dupa manditae kateami. Dupanya lengelyaapi dupa endakali lengelyaapi jia. ⁸Aiyomba^y iti dupa endanya iti asili jia. Dupanya nenge dupa mena layoneⁿenge jia. ⁹Sangali^a dupanya yonge pee aeneme wasepaele dupa pee petae kateamopa, dupanya papa batau batau piamino dupa akali longome yanda pyaanya alo pingisa kii-kau lengeli pia. ¹⁰Dupanya etenge puna dupa kanopato salenda etenge puna jepae dupanya endakali dupa kana yuungi koyasoo katapenge pupu lapae palea. ¹¹Yuli koo etete koko dokonya enjele doko pauyombo dupanya kini joo katenge-pyaa. Doko Iputu pii lao baa kenge Apatone lenge. Gitiki pii lao baa kenge Apalyone^blenge.

¹²Kenda^c pipae wambao doko etapea. Dee lapoma silyamo dolapo tenda ipatana kanjepape!

Enjele tokange dokome beto leamo doko

¹³Dee^d enjele tokange dokome baanya beto doko leamopa, olata toko golome wasepae Gotenya enombatena katenge dokonya denge kitomende dutupanya kainanya pii mende leamo sio. ¹⁴Pii^e leamo dokome enjele tokange beto minatae kateamo doko lamaiyoo, “Enjele kitomende endaki andake Yupotisa matesa anjetae kalyamino dupa embame mokape,” lea. ¹⁵Dopa^f lateamopa baame enjele kitomende dutupa mokea. Enjele kitomende dutupame yuunya endakali dupa pitaka tepoma pyoo lita petala teponge doko pyao kumasalanya kilyoko giipi, koto giipi kanapi, ee kanapi dupa malisoo depa latae kateami. ¹⁶Yanda singi amii mena osa maitanya pituu paenge dupanya itaki yaki doko milione kingi itaka kingi ita lapomana lea. ¹⁷Dokopa^g mena osapi, osa maitanya peteamino dupapi dupa kombea dokome kandeo. Osanya peteamino dupame yonge pee aeneme wasepae kate pyapaelepi, wene pyapaelepi, kakai pyapaelepi dupa petae peteami. Dee osa aiyomba dupa mena layone^haiyomba jiamopa itatepi, kenapi, kana itateme tao alupaepiⁱdupa dokaitanya kambunya pyakaetae katea. ¹⁸Kenda pipae tepoma pyakaetae kateamo dutupame endakali dupa tepoma pyoo lita petala teponge doko pyao kumasiami. ¹⁹Doko, mena osa dutupanya pupu lapae dupa kambunya soo dee etengenya soaka pingi. Dupanya etenge kanopato aiyomba jepae dupame endakali koyasingima.

^x 9:7 Joe 2:4 ^y 9:8 Joe 1:6 ^z 9:8 layone Pa 4:7 doko kandape. ^a 9:9 Joe 2:5

^b 9:11 apalyone Kenge dokonya tenge doko koyasingi akali. ^c 9:12 Ese 7:5; Pa 8:13,

11:14 ^d 9:13 Eke 30:1-3; Pa 8:3 ^e 9:14 Pa 16:12 ^f 9:15 Pa 8:7-12 ^g 9:17 Jop 41:10-13

^h 9:17 layone Pa 4:7 doko kandape. ⁱ 9:17 kana tao alupae Kana tao alupae doko Gotenya imbu kaenge doko makande petae.

²⁰Kenda^j pipae tepoma dutupame endakali dokaita pyao kumaseteaminopa, yangi kateamino endakali dupame opale nyakamanya kingimi wasepae dupa maita maiya nayami. Dupame enjele koopi, opale golopi, silipapi, botonjapi, itapi, kanapimi gotena lao wasepae kapa pao lenge natao, pii nasoo, kaita napayao pipenge sambo gote dupa lao tama pyoo katao yakinala nayami. ²¹Dopa pyoo pituu, endakali pyao kumasingipi, nemango lao oapi pingipi, endakalipi nyilya nyana pingipi pake nengepi, nyakamanya mana dupa maita maiya nayamiaka.

Enjele mendeme Jone buku mende maiyamopa nyoo neamo doko

10 ¹Doko etapeamopa enjele pupu lapae mende kaitinya katao isa epeamo kandeo. Dokonya kopame yonge pee petae kateamopa, baanya aiyomba dokonya lipa kepa sia. Dopa piamopa baanya lengelyaapi doko niki tele petala, moko dolapo anda paka tao katele pia. ²Dokopa^k buku yakane mende baanya kinginya lyangapae siamopa moko tolai-tena solowata pete dokonya katatala koya-tena yuunya katea. ³Baame^l puu lao mena layone^mkyaa lengeli pyoo pii leamopa, kaiti toka kalange leamo dutupame baanya pii yanu piami. ⁴Kaitiⁿ toka kalange dutupame lateaminopa pepa pyalanya pio. Dopa piwaka doko kaitinya katao pii mende leamo dokome lao pituu, “Kaiti toka dutupanya pii lelyamo doko embame yalo petala pepa napyape,” lea.

⁵⁻⁶Enjele^{o p} solowata petepa yuupanya kateamo dokome baanya kingi tolai-tena kaiti-kisa pyalyetala lao pituu, “Gote lete etete katawaka katenge dokome kaitipi, kaitinya silyamo dupapi, yuupi, yuunya silyamo dupapi, solowata petepi, solowata petenya silyamo dupapi, dupa wapuiyamo doko mauwana, kiningi etete gii doko etalanya pilyamo. ⁷Enjele^q kalange dokome baanya beto doko laanya pitamopa, wamba Goteme pitona lao yalo pyoo masetala baanya kalai pingi potopesa dupa lamaiyamo doko panao angi jetana,” lea.

⁸Kaitinya katao pii epeamo sio dokome deaka namba langyoo, “Embame enjele solowata petepa yuupanya kalyamo dokonya kinginya buku lyangapae silyamo doko nyala puu,” lea. ⁹Dokopa^r namba enjele doko kateasa pupala baa lamaiyoo, “Embame buku yakane doko namba dii,” leo. Dopa leopa baame namba langyoo, “Embame buku dake nyepala naa. Natenopa kambunya wapaka tambu tendu pili pyaapomoaka doko, mona kuii salapomona,” lea. ¹⁰Dopa leamopa nambame buku yakane

^j 9:20 Dit 32:15-17; Wee 115:4-7, 135:15-17; Ais 2:8,20, 17:8; Dan 5:4,23; Emo 4:6; 1 Ko 10:19-20; Pa 16:9,11 ^k 10:2 Ese 2:10 ^l 10:3 Wee 29:3-9; Jet 25:30; Emo 3:8 ^m 10:3 layone Pa 4:7 doko kandape. ⁿ 10:4 Dan 8:26, 12:4,9 ^o 10:5-6 Dit 32:40; Dan 12:7 ^p 10:6 Jen 14:19,22; Eke 20:11; Nia 9:6; Wee 146:6 ^q 10:7 Ese 12:28; Dan 9:6,10; Emo 3:7; Sak 1:6 ^r 10:9-10 Ese 2:8, 3:1-3

enjele kinginya siamo doko nyepala neo. Neopa nambanya kambunya wapaka tambu tende pili piamaoka doko, nao goee lateopa mona kuii sia.

¹¹Dokopa^s mendapuaame namba langyoo, “Endakali yonge waka waka katengepi, pii wakale wakale lengepi, yuu dupa pitakanya endakali tata dupapi, kiñi longo dupapi, dupa kandao Goteme pii lelyamo doko embame dee lamaipina,” leami.

Akali lapomame pii latambina leamo doko

11 ¹Dokopa^t mendeme makande ita mende namba ditala lao pituu, “Embame sakatatala Gotenya losuu anda andake^udokopa olata toko dokopa dolapo makande pipi. Dopa petala Gote lao tama pilyamino endakali dupa itaki pyape. ²Dopaka^v doko, losuu anda andake dokonya kamaka kame doko makande napinya kayape. Tenge doko kamaka dokaita netesa endakali dupa maitaena, dupame taono epe etete doko moko katao waimalyoo kana kingi ita kitomende-kisa dee lapoma katatami. ³Dopa pitaminopa, nambame nambanya pii lao panenge akali lapoma epena latopa, dolapome iti angaitipi petala yuu gii taosene mende-kisa andate lapoma dee kingi ita tokange Gotenya pii doko lao panao katatambina,” lea.

⁴Lapoma^w dolapo yuu pitakanya Kamongo dokonya enombanya olipi ita lapomapi kia lama lapomapi jepae. ⁵Mendeme^x dolapo koyasipuli lao masetamo kandao doko, dolaponya nengekaita itate yuli tao pyakaetala dolaponya yandapipi doko tata. Mendeme dolapo koyasipuli lao masetamo kandao doko, itate dokome yandapipi doko dopa pyoo kumapenge. ⁶Dolapome^y Gotenya pii doko lao panatambinopa aiyuu naepena lao kaitinya kaitini lyokapenge pupu lapae doko dolapo-kisa singi. Dee dolapome endaki dupa kapa pao taiyoko injisepenge pupu lapae doko dolapo-kisa soo, kenda pipae tata dupame masetambinoli pyoo yuunya endakali dupa koyasepenge pupu lapae doko dolapo-kisa soaka pingi.

⁷Dolapome^z Gotenya pii doko lamaiyoo etapatambinopa, mena kapua mendepale mende yuli koo etete koko dokonya katao pyakalyingi dokome dolapo yanda pimaitala ita minao pyao kumasetata. ⁸Pyao^a kumasetala dolapo yuu taono andake kongali lao Sotoma lata Isipe lata pingi dokonya kaitini andake dokonya setata. Wamba dolaponya Kamongo doko taono dokonya ita pokonya kumia. ⁹Endakali pii wakale wakale lengepi, yonge

^s 10:11 Jet 1:9-10, 25:30; Dan 3:3-4 ^t 11:1 Ese 40:3; Sak 2:1-2 ^u 11.1 *gotenya losuu anda andake* Gotenya losuu anda andake lelyamo doko Kataisanya sosa doko kandao kongali joo lelyamo. ^v 11:2 Wee 79:1; Ais 63:18; Dan 7:25; Sak 12:3; Lu 21:24;

Pa 12:6,14, 13:5 ^w 11:4 Sak 4:3,11-14 ^x 11:5 2 Sam 22:9; 2 Kij 1:10; Wee 97:3; Jet 5:14

^y 11:6 Eke 7:17-20, 11:10; 1 Sam 4:8; 1 Kij 17:1; Je 5:17 ^z 11:7 Dan 7:3,7,21; Pa 12:17, 13:1,5,7, 17:8 ^a 11:8 Ais 1:9-10; Lu 13:34

waka waka katengepi, yuu dupa pitakanya endakali tata dupa pitakame dolapo koto tepoma-kisa dee yongama gii mende pyoo kandatala mendemepi nyoo malu pina lao kayala nayatami. ¹⁰Dolapome^b Gotenya pii doko lao panatambinosa yuunya endakali dupa tanda koo nyepala dolapo taeme kumilyambinona lao dupame mona yaepao oapi dupa mende mai mai pitami. ¹¹Koto^c tepoma-kisa dee yongama gii mende pyoo patatamopa, Gotenya lete katasingi poo doko dolapo-kisa ipata. Dopa pitamopa dolapo sakatatala toya katatambinopa, kandatamino endakali dupame etete pakame kumatami. ¹²Dolapome^d setambinopa kaitinya katao pii mende latamo dokome dolapo lao puu lao wii lao lao pituu, “Nyilyambo ketae dakenya ipupa,” lata. Dopa latamopa dolapo kopa kaina dokonya kaiti-kisa patambino doko yandapipi dupame kandatami. ¹³Gii^e dokopaka titiwali andake mende minatala, taono dokonya anda yuupi dupa pitaka kingi ita pyoo lita petala dupanya mende koyata. Dee taono dokonya endakali taosene kalange dupa titiwali minatala pyao kumasete. Dopa pitamopa endakali yangi katatamino dupame etete pakame kumapala, kaitinya Gote doko lao lalyetami. ¹⁴Kenda^f pipae laponge doko etapea. Dee teponge doko tenda yapa ipatana kanjepape.

Enjele kalange dokome beto leamo doko

¹⁵Enjele^g kalange dokome baanya beto doko leamopa, yangimi kaitinya katao puu lao lao pituu, “Yuu dupa pitaka indupa naimanya Kamongo Gotepa Kataisapa dolapome isoo katapelyambinona, tanga tangapi isoaka katatambina,” leami. ¹⁶Dokopa^h isingi akeli kingi ita lapoma-kisa dee kitomende Gotenya enomba-tena nyakamanya tokonya petengema dupame luma lakao tombauli soo Gote lao tama piامي. ¹⁷Dupameⁱ lalyoo lao pituu,

“Kamongo Gote, emba wamba waka kateeno,
indupa kalyeno doko-kisa pupu lapae silyamo.
Embanya pupu lapae andake doko tange nyepala.
embame tee pyao isoo kalyeno dokonya naimame emba lao yaka
pilino lelyamano.

¹⁸Netesa^j endakali dupame imbu kayaminopa
embame dupa tanda maipengepi, endakali kumapae dupa yapapenge
giipi doko ipatea.
Dee embanya kalai pingi potopesa dupapi,

^b 11:10 Est 9:19; Jo 16:20 ^c 11:11 Ese 37:5,10 ^d 11:12 2 Kin 2:11 ^e 11:13 Ese 38:19-20;
Pa 6:12, 8:5, 16:18 ^f 11:14 Ese 7:5; Pa 8:13, 9:12 ^g 11:15 Eke 15:18; Wee 10:16, 22:28;
Dan 2:44, 7:14,27; Opa 21; Sak 14:9; Pa 1:5, 12:10 ^h 11:16 Pa 4:4,10 ⁱ 11:17 Emo 3:13,
4:13; Pa 1:4,8, 4:8, 15:3, 16:5,7,14, 19:6,15, 21:22 ^j 11:18 Wee 2:1,5, 46:6, 110:5, 115:13;
Emo 3:7; Lo 2:5; Pa 10:7, 19:2,5, 20:11-13

embanya endakali kenge singipi nasingipi,
emba paka kayao katenge dupapi, dupa yole maipengepi,
yuu minao koyasiamino dupa koyasepengepi dutupa pipenge gii
doko ipateana,” leami.

¹⁹Dopa^k leaminopa Gotenya losuu anda kaitinya katenge doko lumbapae
siamopa, Gotenya pii lao setapae palenge bokosa doko andokote-kaita
panao sia. Dokopa yuu wapaka dupa pyoo mulumalu lao kaiti katao
titiwali minao tandake kapa yale dupa epea.

Enda mendepa kanopato pambea mendepanya pii leamo doko

12 ¹Kongali^l andake mende kaitinya panao dapa pia: enda mendeme
niki doko yonge pee petae petea. Kana doko baanya moko
pundipundi dokonya kateamopa aiyomba dokonya bui kingi ita-kisa dee
lapoma balu joo manditae petea. ²Baa^m wane tongota doko manjanya
maita piamopa baa etete tanda napala puu lao ae lao wane manjanya
pia. ³Deeⁿ kongali waka mende kaitinya panao dapa pia: kanopato
pambea kangyoo andake aiyomba kalange katenge doko aiyombanya
nenge kingi ita mende katenge-pyaa. Aiyomba dutupanya kijinya balu
kalange manditae katea. ⁴Baanya^o etenge dokome kaitinya bui dupa
pitaka tepoma pyoo lita petala teponge doko pyalyandanya isa yuunya
pyandea. Dopa petala enda wane manjanya piamo dokonya enomba-
tena soo wane doko mandipatamopa baa nyoo nalanya anga petae sia.
⁵Dokopa^p enda dokome wane ane mende mandea. Tenda wane dokome
aene kolyepe mende minao yuu dupa pitakanya endakali tata dupa pitaka
iseta. Enda dokome wane doko mandipiamopa mendeme nyimina ketae
Gotepa Gotenya isoo petenge toko dokopanya pea. ⁶Dokopa^q enda doko
paka pyakao endakali napalenge yuu mendenya pea. Peamo yuu dokonya
mendapuame baa yuu gii taosene mende-kisa andate lapoma dee kingi ita
tokange pyoo dutupanya nee maina lao Goteme yuu depa lakamaiya.

⁷Kaitinya^r yanda andake mende sakatea. Enjele Maikele lenge dokopi
baanya enjele dupapimi pambea andake doko yanda pimaiyaminopa,
baapi baanya enjele dupapimi itingi pimaiyoo yanda pyoo kateami.

⁸Dopaka doko, pambeapi baanya enjelepi dupame yandanya ita
minalanya kyoto nanjepala, kapa pao kaiti-kisa dee katapenge nanjia.

⁹Dokopa^s Maikelepi baanya enjelepi dupame pambea andakepi baanya
enjelepi dupa soo isa pyandeami. Kanopato doko kenge Satane lata,

^k 11:19 Eke 9:24, 25:10; 1 Kirij 8:1-6; Ese 1:13; Ip 8:5, 9:4; Pa 4:5, 8:5, 15:5,

16:18,21 ^l 12:1 Sol 6:10 ^m 12:2 Jen 3:16; Ais 66:7 ⁿ 12:3 Dan 7:7

^o 12:4 Dan 8:10 ^p 12:5 Wee 2:9; Ais 7:14, 66:7; Pa 2:27, 19:15 ^q 12:6 Pa 11:2-3, 12:14

^r 12:7 Dan 10:13,21, 12:1; Ju 9; Pa 20:2 ^s 12:9 Jen 3:1,4,14-15; Sak 3:1; Lu 10:18, 22:31;

Jo 12:31; Pa 20:2-3

dee Tenge Setenge lata pingi doko, baa wambatae waka. Baame yuunya endakali dupa pitaka minakasingi.

¹⁰Mendeme^t kaitinya katao puu lao lao pituu, “Naimanya Gote dokonya enomba-tena katao kuka kotakapi naimanya masoo miningi kaiminingi dupa-kisa tenge setao katenge doko kaitinya soo isa pyandatelyamino. Tenge dokonya minao Gotenya pyoo nyingi manapi, pupu lapaepi, isingi manapi, dutupa epapuaka ipatelyamo. Dee baanya Kataisa doko pupu lapae nyepelyamoaka. ¹¹Naimanya masoo miningi kaiminingi dupame Sipisipi Yakane dokonya taiyoko dokopa, baanya lao pii lamaingi dokopa dolapome tenge setao katenge doko ita miniami. Dopa petala dupame nyakama tange kapa pao kumatamane lao etete nea nakayami. ¹²Tenge^u dutupanya minao emba kaitipi, nyakama kaitinya katenge dupapi mona yaepalapa! Dopaka doko, isa yuupi solowata petepi nyakama etete koyatami iki lamo. Doko, Satane baa isa nyakama-kisa epeamo dokome gii kuki iki katatama lumu lao masetala etete tomba nao epeana,” lea.

¹³Pambea^v dokome baa soo isa yuunya pyandeami kandatala, enda wane ane mandeamo doko baame boo wataminia. ¹⁴Dokopa^w enda doko baanya yuu depa lakamaiyamo endakali napalenge yuu dokonya buu lao pena lao mendeme yaka lakepame andake mendenya papa mendalapo baa maiya. Yuu dokonya baa pambea dokopa tependa joo pitatamopa ee kana tepoma-kisa dee kana tokange dutupanya baa isoo nee maitami. ¹⁵Dokopa endaki liyepala enda doko soo paakale pena lao enda dokonya maitasa kanopato dokome endaki katyuu pyasia. ¹⁶Dopaka doko, yuu dokome enda doko nisoo pukuotala, endaki andake kanopato dokome katyuu pyasiamo doko nyoo koko palyia. ¹⁷Dokopa^x kanopato dokome enda doko etete imbumi kumapala, enda dokonya wane waka dupame Gotenya mana setapae dupa watao minao Jisasame pii leamo dupa watao miningi endakali dupa yanda pimaiya pea. ¹⁸Dopa petala kanopato doko baa solowata pete lemba dokonya sia.

Mena kapua mendepale mende epea

13 ¹Dokopa^y mena kapua mendepale mende solowata pete dokonya-kaita pyakalyetala epeamo kandeo. Dokonya aiyomba kalangekalyamopa aiyombanya nenge kingi ita mende katenge-pyaa. Dutupanya kiņinya balu mendai mendai lao manditae kateamopa, aiyomba dutupanya Gote kandao lamba lao pii mende latae katea.

²Mena^z kapua doko yana lepata jia. Dokonya moko dupa mena bea moko

^t 12:10 Jop 1:9-11; Sak 3:1; Pa 11:15 ^u 12:12 Ais 44:23, 49:13; 2 Ko 6:2; Pa 20:3

^v 12:13 Jen 3:15 ^w 12:14 Eke 19:4; Ais 40:31; Dan 7:25, 12:7; Pa 11:3, 12:6

^x 12:17 Jen 3:15; Dan 7:7,21; Pa 11:7, 13:7, 14:12 ^y 13:1 Dan 7:3; Pa 12:3, 17:3,7-12

^z 13:2 Dan 7:4-6

jiamopa nengekaita doko mena layone^anengekaita jia. Dokopa kanopato dokome baanya pupu lapae andakepi, kalai pingi manapi, isingi kalai dokopi, dutupa mena kapua doko maiya. ³Dokopa^b mena kapua dokonya aiyomba dupanya mende kumapenge joo pyao lombaloo petayaka doko, dee mumba pyoo mee jia. Dopa piamopa endakali dupa pitakame tunduma pingi kapua doko kandao mona andao baa watao miniami.

⁴Watao^c minao pituu, kanopato dokome baanya pupu lapae doko mena kapua doko maiyamo dokonya kanopato doko tama piامي. Dopa pyoo pituu mena kapua doko apata tama pyoo dapa leami: “Mena kapua dakepa apipa kapape? Apimi kapa pao pimaitape?” leami.

⁵Mena^d dokome Gote kilya kandao luiyao katena lao Goteme yakinatala kaya. Dopa petala mena dokome kana kingi ita kitomende-kisa dee lapomanya mana doko kapa pao minapenge pupu lapae nyina lao kayaka. ⁶Baame^e Gote kilya kandao lao pituu, Gotenya kengepi Gote katenge pandapi kaitinya katenge dupapi dupa kandao kilya kandeaka. ⁷Baame^f Gotenya endakali dupa yanda pimaitala ita minina lao Goteme baa yakinatala kaya. Dopa piamopa endakali pii wakale wakale lengepi, yonge waka waka katengepi, yuu dupa pitakanya endakali tata dupapi dupa pitaka isoo katapenge pupu lapae doko nyia. ⁸Goteme^g yuu dake tee pyao wapuiyamo dokonya pituu indupa tuu lao endakali lete etete katenge kenge singi buku dokonya kenge nasiamo endakali dupa pitakame mena kapua doko tama pitami. Buku doko Sipisipi Yakane pyao kumasetae dokonya.

⁹Endakali^h kalekaita singi dokome pii dake sokondape pipenge. ¹⁰Endakaliⁱ mende anjetae palya pupenge tamo kandao doko, baa anjetae palya pupenge. Endakali mende konjuame kumapenge tamo kandao doko, baa konjuameaka kumapenge. Mana dolaponya Gotenya endakali dupame masoo minao kyoto joo katapenge.

Dee mena kapua mendepale mende epea

¹¹Dee nambame kandeopa mena kapua mendepale mende yuu koko paliuu pyakalyia. Dokonya aiyombanya nenge lapoma kateamo dolapo sipisipi yakane mendenya aiyombanya nenge jiamopa, pii leamo doko kanapato pambeame lengeli pia. ¹²Mena laponge dokome mupa dokonya pupu lapae dupa pitaka nyepala baame dokonya enombanya kalai pia. Dopa pyoo pituu yuupi yuunya endakali dupapi dupame mena aiyomba

^a 13.2 *layone* Pa 4:7 doko kandape. Dee yana lepata lenge dokopi mena bea lenge dokopi dupa mendai dopaleaka jepae. ^b 13:3 Jet 27:6; Lu 4:6; Pa 17:8 ^c 13:4 Jet 27:6; Pa 17:8 ^d 13:5-6 Dan 7:8,11,25, 11:36 ^e 13:6 Pa 11:2-3 ^f 13:7 Dan 7:7,21; Pa 11:7, 12:17 ^g 13:8 Eke 32:32-33; Wee 69:28; Dan 12:1; Pl 4:3; Pa 3:5, 5:6, 17:8, 20:12,15, 21:27 ^h 13:9 Mt 13:9; Mk 4:23; Pa 2:7 ⁱ 13:10 Jet 15:2, 43:11; Mt 26:52; Pa 14:12

pyao lombaloo petae dee mumba piamo mupa doko tama pina lao pyalanya pia. ¹³Mena^j laponge dokome kongali paka pipae dupa pia. Kongali dupanya mende, baame endakali dupanya enombanya itate mende kaiti-kisa katao yuunya epena lea. ¹⁴Baame^k mena mupa dokonya enombanya dopa pina lao Gotemekayamopa, kongali dupa pyoo yuunya endakali dupa minakasia. Dopa pyoo pituu yuunya endakali dupa lamaiyoo, “Nyakamame mena kapua konjua kombe paleta lete kalyamo mupa doko wangi tao mende wasalapapena,” lea. ¹⁵Dupame^l mena mupa doko wangi tao wasiamino doko mena laponge dokome lete katasina lao Goteme kaya. Dopa piamopa wangi tao wasepae dokome pii latala, baa lao tama pyuani nakayatamino endakali dupa kumasalanya kalai pia.

¹⁶Mena^m laponge dokome kamongopi tipyapi, endakali kenge singipi nasingipi, kendemanepi mee endakali dupapi, dupa pitakame kingi tolai tamopi langalunya tamopi dupanya kongali mende petae katapengena lea. ¹⁷Dopana, mena mupa dokonya kenge doko tamopi kenge itaki yaki doko tamopi dolapome endakali mende-kisa kongali petae nakatatamo kandao, dokome oapimi topo nyala nayao, baa-kisa sambala nayawaka pipenge. ¹⁸Naimameⁿ dake masokondape pipenge: mena dokonya itaki yaki doko andate tokange-kisa kingi ita tokange dee wakao tokangeaka jilyamo doko masepae endakali mendeme yapokondape pipenge. Itaki yaki dokome endakali mende makande pilyamo.

Endakali eteteaka longo dupame wee enenge mende leami

14 ¹Nambame^o kandeopa Sipisipi Yakane doko yuu manda Sayone lenge dokonya katea. Endakali taoseneaka andate mendai dee kingi ita kitomende-kisa wakao kitomendeaka baa-pipa awapa kateami. Dutupanya langalunya baanya kengepa, baanya Takanganya kengepa dolapo pepa pyatae katea. ²Dokopa^p kee-kae mende kaiti-kisa leamo doko endaki andake oo lengepi, kaiti katengepi dopale jia. Gitaa pingi endakali dupame gitaa pilyaminipa linu lao katengeli pia. ³Gotenya^q isoo petenge tokopi, opale lenge tenge kitomendepi, isingi akalipi, dutupanya enombasa katao wee enenge mende leami. Yuunya endakali dupanya Goteme sambao nyepeamo taoseneaka andate mendai dee kingi ita kitomende-kisa wakao kitomendeaka dutupame iki kapa pao wee doko mana nyiami. Mendeme wee doko kapa pao mana nyepenge nanjia. ⁴Akali^r mendapuame enda watandala nayao kinambo joo katengemali

^j 13:13 1 Kij 18:24-39; Mt 24:24; 2 Te 2:9-10 ^k 13:14 Dit 13:2-4; Pa 19:20

^l 13:15 Dan 3:4-6; Pa 15:2 ^m 13:16 Pa 7:3, 14:9,11, 16:2, 19:20, 20:4 ⁿ 13:18 Pa 17:9

^o 14:1 2 Kij 19:30-31; Ese 9:4; Joe 2:32; Opa 17; Sep 3:12-13; Ap 2:21; Pa 7:3-4

^p 14:2 Ese 1:24, 43:2; Pa 1:15, 19:6 ^q 14:3 Wee 33:3, 40:3, 96:1, 98:1, 144:9, 149:1;

Ais 42:10; Pa 5:9, 7:4, 15:3 ^r 14:4 Jet 2:2-3; Ep 5:27; Je 1:18

pyoo katapala endakali dutupame Sipisipi Yakane doko pelyamo kaitini dupanya watao paengema. Goteme dutupa endakali kaina dupanya sambao nyia. Dutupa Gotepa Sipisipi Yakane dokopanya wambao sambao nyepae joo katengema. ⁵Dupame^s sambo pii laa naengema. Dupa-kisa tenge mende nasingi.

Enjele tepomame pii leamino doko

⁶Enjele^t mende kaitipa kopao pee lao payamo dokome Wai Pii Epe sulu soo singi mende minao ipao endakali pii wakale wakale lengepi, yonge waka waka katengepi, yuu dupa pitakanya endakali tata dupapi, dupa lamaiya. ⁷Baame^u puu lao lao pituu, “Goteme endakali yapapenge giidoko tengesa petelyamona, nyakamame baa paka kayao tama pyoo kalyepape. Baame yuupi, kaitipi, solowata petepi, endaki lee kuingipi dupa wasiamo doko tama pyepape,” lea.

⁸Dee^r enjele laponge dokome wambao doko watao ipupala lao pituu, “Bapilone^y yuu taono andake doko koyatelyamo. Kiningi, koyatelyamo. Yuunya endakali pitakame kepo kolenge mana kyoto joo watao minilyamino doko Bapilone tange dupame sakatasiami. Dopa piamino doko dupame endaki waene jepae doko yuunya endakali pitakame nena lao maiyamina,” lea.

⁹⁻¹⁰Dee^{x y} enjele mende tepo pyoo lapoma dolapo watao epeamo dokome puu lao lao pituu, “Endakali mendeme mena kapua mendepale dokopa, doko wangi tao wasepae dokopa dolapo lao tama pyoo, mena dokonya kongali doko kinginya tamopi langalunya tamopi petae katatamo kandao doko, baa tangeme Gotenya imbu kaenge endaki waene jepae doko nata. Waene doko Goteme endaki-pipa pyasala nayao imbu kaenge kapo penge dokonya kai latamo doko, endakali dokome nata. Dokopa endakali doko kana itateme tao alupae^z dokonya enjele etete epe dupapi, Sipisipi Yakane dokopi, dupanya enombasa tanda koo nao katata. ¹¹Dopa^a pitamopa itaita dokome endakali dopale dupa tanda maiyoo, koteaka lao kena pitamo doko pyoo ketae pyakalyeta. Dokopa mena dokonya kengunya kongali doko petae katapala baapa baa wangi tao wasepae dokopa dolapo lao tama pilyamino endakali dupa kuka kotakapi imambu nala nayatamina,” lea.

^s 14:5 Wee 32:2; Ais 53:9; Sep 3:13 ^t 14:6 Dan 3:4; Pa 8:13 ^u 14:7 Eke 20:11; Wee 146:6; Pa 4:11, 10:6 ^v 14:8 Ais 21:9, 51:17; Jet 25:15, 51:7-8; Pa 17:2, 18:2-3 ^w 14.8 *bapilone* Wamba Olotesamene gii dokopa Bapilone tange dupame koaka pyoo katao koonya kenge soo kateami-pyaa. Dokopa taono Bapilone doko koona lao kenge singi doko nyoo taono Loma makande pyoo waa katao lapae silyamo. ^x 14:9 Pa 13:12-17, 14:11, 16:2, 19:20, 20:4 ^y 14:10 Jen 19:24; Wee 11:6, 75:8; Ais 51:17,22; Jet 25:15; Ese 38:22; Pa 15:7, 16:19, 19:20, 20:10,14, 21:8 ^z 14.9-10 *kana tao alupae* Pa 9:17 doko kandape. ^a 14:11 Jen 19:28; Ais 34:9-10; Pa 13:12-17, 14:9, 16:2, 19:3,20, 20:4

¹²Mana^b dopale dupanya Gotenya endakali dupame baanya mana setapae dupa watao minao Jisasa lao masoo minao kyoto joo katapenge.

¹³Dee^c kaitinya pii mende leamo dokome lao pituu, “Embame pepa dapa lao pyape. Endakali Kamongo dokopa pakatae katao epapu kumatamipi, dee ene kumatamipi, dupame mona yaepena. ‘Dupame lekeleke tao kateamino dupanya kiningi etete koto katatami. Epe piamino dupa dupa-kisa sepeta patamina,’ Sipitisa dokome dopa leana,” lea.

Nee mandenge gii doko

¹⁴Dokopa^d kopa kyoo lapae mende siamopa ongonya mende petea. Doko endakali petele pyoo balu golome wasepae mende mandyuu konjua nenge katapae mende minatae petea. ¹⁵Dee^e enjele mende kaitinya losuu anda andake dokonya katao kamaka ipupala puu lao kopa ketae peteamo doko lamaiyoo, “Yuunya nee dupa wambu petelyamona embanya konjua dokome lyao mandi. Indupa nee mandipenge giina,” lea. ¹⁶Dopa^f lateamopa kopa ketae peteamo dokome baanya konjua doko isa pyandatala yuunya nee wambu petae dupa lyao mandea.

¹⁷Dee enjele mende kaitinya losuu anda andake dokonyaka katao kamaka epeamo dokome konjua nenge katape mende miniaka. ¹⁸Dee^f enjele mende itate isingi pupu lapae singi doko olatatoko dokonya katao epea. Ipupala puu lao enjele konjua nenge katapae miningi doko lamaiyoo, “Yuunya getepe dupa wambu petelyamona, embame embanya konjua nenge katapae dokome lyaa,” lea. ¹⁹Dopa^g lateamopa enjele dokome baanya konjua doko yuunya pyandatala getepe dupa lyia. Lyapala getepe indingi Gotenya imbu kaenge yuli andake dokonya pyandea. ²⁰Dokopa yuu taono andake dokonya kamalyatena getepe indingi yuli dokonya mendeme indiamopa yuli ketae dokonya taiyoko pyakalyetala liyoo yuu etete tependa waka pea. Ketae liyoo epeamo dupa pituu endakali dupanya mangenya lita pia.

Enjele kalange dupame kenda pipae kalangeaka sepeta kateami

15 ¹Dee^h kaitinya kongali andake waka mendepale mende pia. Enjele kalange mendatupame endakali koyasalanya kenda pipae kalangeaka sepeta kateami. Kenda pipae dutupa etatamopa dee ipata mende nasia. Dutupa-kisa Gotenya imbu kaenge doko etalakao etea.

²Deeⁱ solowata pete jepae mendita mende kandeo. Doko galasa mende itate-pipa mendenya pali-pali petae jia. Lemba dokonya mena kapua

^b 14:12 Pa 12:17, 13:10 ^c 14:13 Mt 11:28-29; 1 Ko 15:58; 2 Te 1:7; Ip 4:10

^d 14:14 Dan 7:13; Pa 1:7 ^e 14:15 Joe 3:13; Emo 8:2; Mt 13:30,39-40; Jo 4:35

^f 14:18 Joe 3:13; Pa 6:9-10, 8:3-5 ^g 14:19-20 Ais 63:1-6; J.Ee 1:15; Pa 19:15

^h 15:1 Lep 26:21; Pa 15:6-7 ⁱ 15:2 Pa 4:6, 5:8, 7:9,14

mendepale dokopi, baa wangi tao wasepae dokopi, baanya kenge itaki yaki dokopi, dutupa ita miniamino endakali dupa Goteme gitaa jepae maiyamo dupa minatae kateami. ³Dupame^j Sipisipi Yakane dokopa, Gotenya kendemane Mosesepanya wee dopale joo dapa leami:

“Eteteaka pupu lapae pitaka Kamongo Gote emba-kisa silyamo.

Embame kalai piino dupa andakeaka jilyamo.

Dupa kandao mona andelyamano.

Endakali tata pitakanya emba kiŋi kalyeno.

Embanya mana dupa angipi tolatepiaka silyamo.

⁴Kamongo,^k emba iki epe etete kalyeno doko apimi paka nakayatape?

Emba apimi lalyala nayatape?

Embanya mana tolatae dupa panao ipatea.

Tenge ongonya endakali tata pitakame emba lao tama pyaa ipatami.

⁵Dopa^f lao wee doko lateaminopa, Gote kalyamona lao panasingi kaitinya losuu anda lapalapame petae andakote dokonya panda eteteaka epe doko lumbiamo kandeo. ⁶Dokopa^m enjele kalangeme kenda pipae kalangeaka sepeta kateamino dutupa panda eteteaka epe dokonya katao kamaka epeami. Dupame lapalapa kaimala napingi etete kyoo lapae dupa petala matapu golome wasepae dupa sangalinya pyoo epeami.

⁷Opaleⁿ lenge tenge kitomende dutupanya mendeme pelesa golome wasepae kalangeaka enjele kalange dutupa menda menda maiya. Gote katawaka katenge dokonya imbu kaenge doko pelesa kalange dutupanya tumbatae katea. ⁸Dokopa^o Gotenya tii pipaepa pupu lapaepa dolaponya kena piamo dokome panda eteteaka epe dokonya tumbatae kateamopa, mendemekapa pao andaka dokonya kolandapenge nanjia. Enjele dutupame kenda pipae dutupanya kalai pyoo etasetena lao malisepenge jia.

Pelesa kalange Gotenya imbu kaenge sepeta dutupa

16 ¹Dokopa^p ^q pii mende panda eteteaka epe dokonya katao puu lao enjele kalange dutupa lamaiyoo, “Nyakamame pupala pelesa kalange Gotenya imbu kaenge sepeta dutupa yuunya kai laapape,” lea.

²Dopa^r lateamopa enjele wambao dokome pupala baanya pelesanya sepeta doko yuunya kai lea. Dokopa mena kapua mendepale dokonya kongali petae endakali dupame mena doko wangi tao wasepae doko lao tama pyoo katenge dupa-kisa amungi aii pyao etete tanda pingi dupa pia.

^j 15:3 Eke 15:1,11; Dit 32:4; Wee 92:5, 111:2, 139:14, 145:17; Jet 10:10; Pa 1:8, 11:17, 16:7 ^k 15:4 Wee 86:9-10; Jet 10:6-7; Mal 1:11 ^l 15:5 Eke 38:21, 40:34

^m 15:6 Lep 26:21; Pa 15:1, 19:8 ⁿ 15:7 Wee 75:8; Ais 51:17,22; Jet 25:15; Pa 14:8,10, 16:19 ^o 15:8 Eke 40:34; 1 Kij 8:10-11; 2 Ktl 5:13-14; Ais 6:4; Ese 44:4 ^p 16:1 Wee 69:24; Ais 66:6; Jet 10:25; Ese 22:31; Sep 3:8; Pa 16:17 ^q 16:1-21 Pa 8:6-12 ^r 16:2 Eke 9:10; Dit 28:35; Pa 13:12-17

³Dee^s enjele laponge dokome baanya pelesanya sepeta doko solowata pete dokonya kai lea. Dokopa solowata pete doko endakali kumapaenya taiyoko jiamopa opale lenge tenge solowata petenya singi dupa pitaka kumia.

⁴Dee^t enjele teponge dokome baanya pelesanya sepeta doko endaki lee kungipi, andakepi dupanya kai leamopa, dupa pitaka taiyoko jia.

⁵Dokopa^u endakinya enjele dokome Gote kandao lao pituu, “Emba wamba waka kateeno doko, indupa kalyeno. Emba etete epe. Embame mana tolatae minao endakali dupa yapee. ⁶Endakali^v dupame embanya endakali dupapi, potopesa dupapi, dupa pyao kumasiaminopa taiyoko kai latae katea. Dopa piaminopa embame endakali dupa taiyoko nena lao maiino doko dupa-pipa kapa peana,” lea. ⁷Dee^w olata toko dokonya katao pii mende leamo dokome lao pituu, “Kiningi, Kamongo Gote, eteteaka pupu lapae, embame mana angipi tolataepi minao endakali yapengena,” lea.

⁸Enjele kitomende dokome baanya pelesanya sepeta doko niki lenge dokonya kai lea. Dokopa niki dokome endakali dupa yangena lao Goteme kayamopa niki dokome dupa yangea. ⁹Niki^x doko eteteaka itaita koo pipae dokomena endakali dupa tao mulyoo pituu, kenda pipae dutupa isingi pupu lapae singi Gote doko kilya kandao kateami. Dopa petala dupame mona kapilyoo baa lao lalyala nayami.

¹⁰Enjele^y yuungi dokome baanya pelesanya sepeta doko mena kapuanya isoo petenge kiŋi toko dokonya kai leamopa, kapua dokome isingi endakali dupa-kisa iminjia. Endakali dupa tanda koo nao, keke tange kepao neami. ¹¹Doko^z amungi piapi tanda neamipi tenge dolaponya dupame Gote kaitinya katenge doko kilya kandao mona kapilyala nayao nyakamanya mana koo miniamino dupa maita maiya nayami.

¹²Enjele^a tokange dokome baanya pelesanya sepeta doko endaki andake Yupotisa lenge dokonya kai leamopa kiŋi dupa niki pyakaengesakaita ipatami kaitini doko depa latae sina lao endaki doko tukea.

¹³Dokopa^b enjele koo tepoma monge jepae mendatupa kanopato pambea kambupi, mena kapua dokonya nengekaitapi, sambo potopesa nengekaitapi dupanya pyakalyiami. ¹⁴Enjele^c koo Satane jepae dupame kongali dupa pingima. Dupame yuunya endakali pitakanya kiŋi dupame Gote eteteaka pupu lapae dokome yapatamo gii dokonya yanda pina lao nyoo limbala pengema.

^s 16:3-4 Eke 7:17-21 ^t 16:4 Wee 78:44 ^u 16:5 Dit 32:34; Wee 119:137, 145:7; Pa 11:17
^v 16:6 Wee 79:3; Ais 49:26; Ese 35:6; Mt 23:25; Pa 6:9, 18:24 ^w 16:7 Wee 19:9, 119:137;
Pa 1:8, 15:3, 16:14, 19:2 ^x 16:9 Emo 4:6; Pa 9:20-21, 16:21 ^y 16:10 Eke 10:21-23;
Ais 8:22 ^z 16:11 Jet 5:3; Pa 9:20-21, 16:21 ^a 16:12 Ais 11:15-16, 44:27; Jet 50:38, 51:36;
Pa 9:14 ^b 16:13 Eke 8:3 ^c 16:14 Pa 1:8, 16:7, 19:6,15,19

¹⁵Kandeleno!^d Pake nenge endakali mende epengeli pyoo namba ipato. Dopana, endakali mendeme lenge tao katapala baanya elya pingi doko mendeme nakandena lao, papata napayao yongenya pingi yakinala nayao pingi endakali doko baa mona yaepena.

¹⁶Maitakao^e enjele koo dupame kiñi dupa laminao pao yuu mende Iputu pii lao kenge Amaketono^flenge dokonya limbiami.

¹⁷Enjele^g kalange dokome baanya pelesanya sepeta doko poo dokonya kai lea. Dopa piamopa losuu anda andake dokonya kiñi petenge toko dokonya-kaita pii mende puu lao leamo doko kamaka epea. Dokome lao pituu, “Dutupa pyoo etapelyamona,” lea. ¹⁸Dokopa^h yuu wapaka pyoo mulumalu lao kaiti katao titiwali etete andake mende minia. Endakali tee pyao kateamino dokonya pituu indupa tuu lao titiwali etete andake dopale mende naminia-pyaa. ¹⁹Yuuⁱ taono andake doko toka lapala tepoma piamopa, endakali tata pitakanya yuu taono dupa koya. Doko Goteme Babilone^jyuu andake doko masetae katapala waene petenge kapo penge dokonya Babilone tange dupame waene nena lao makapusia. Waene doko Gotenya imbu kaenge etete andake doko. ²⁰Dee^k endaki pete kainanya yuu singi dupa pitaka alu pyoo eteamopa, yuu manda mendaipi mende nasia. ²¹Tandake^l kapa andake kana lungutapaele dupa kaiti-kisa katao endakali dupa-kisa epea. Ipupala endakali dupa koyasoo etete kenda piasiamo dokonya dupame Gote kandao lamba leami.

Enda akali nyele-nyele paenge mendepa mena kapua mendepale dokopa

17 ¹Pelesa^m kalange minatae kateamino enjele kalange dupanya mendeme namba kateosa ipupala lao pituu, “Endaki longo satitoponya pitipala akali nyele-nyeleⁿpaengenya etete kenge singi enda dokonya yanu nyetamo doko laitaka pitoo ipu. ²Yuunya^o kiñi dupame enda doko-pipa kepo piami. Enda dokonya akali nyele-nyele paenge mana waene jepae dokome yuunya endakali dupa kyekeamina,” lea.

³Dokopa^p Oli Sipitisa dokome namba sakatasiampopa, enjele dokome namba nyoo endakali napalenge yuu mendenya pea. Dopa peteamopa

^d 16:15 Mt 24:43-44; Lu 12:39-40; 1 Ko 1:8; 1 Te 5:2,4; 2 Pi 3:10; Pa 3:3,18

^e 16:16 Isi 5:19; 2 Kiñ 9:27, 23:29; Sak 12:11; Pa 20:8 ^f 16:16 amaketono Tenda yuu gii etatamo dokopa yuu Amaketono dokonya koo epepi dupa yanda pitami panda mende kandao lelyamo. Pa 19:19-21 doko kandape. ^g 16:17 Ais 66:6; Pa 16:1, 21:6

^h 16:18 Eke 19:16; Dan 12:1; Mk 13:19; Pa 4:5, 8:5, 11:19 ⁱ 16:19 Wee 75:8; Ais 51:17,22; Jet 25:15; Pa 14:8,10 ^j 16:19 babilone Pa 14:8 doko kandape. ^k 16:20 Pa 6:14,20:11 ^l 16:21 Eke 9:22-26; Pa 11:19, 16:9,11 ^m 17:1 Jet 51:12-13; Ese 16:23; Pa 17:15 ⁿ 17:1 akali nyele-nyele Taono Babilone doko kandao kongali lao akali nyele-nyele paenge endana lenge. Pa 14:8 doko kandape. ^o 17:2 Ais 23:17; Jet 25:15-16, 51:7; Pa 14:8, 18:3 ^p 17:3 Pa 13:1

mena kapua kate pyapae mendenya ketae enda doko peteamo kandeo. Mena dokonya yonge doko pitakanya Gote lamba lenge pii longo dupa pepa pyatae katea. Mena dokonya aiyomba kalange kateamopa aiyombanya nenge kingi ita mende katea. ⁴Enda^q dokome yongenya pingi wene pyapaepa kate pyapaepa mendalapo petala, golopi, kana auu pipae muni longome sambengepi, mamakupi dupame yati petae petea. Dopa petala kapo penge golome wasepae mende miniamo dokonya baanya akali nyele-nyele paenge mana dokonya aii pyapaepi koopimi tumbatae katea. ⁵Baanya^r kenge kongali pyoo baanya langalunya dapa lao pyatae katea: Babilone^s yuu andake doko, enda akali nyele-nyele paenge dupapi mana aii pyapae miningi endakali dupapinya tengena lao pyatae katea. ⁶Enda^t dokome Gotenya endakalipi Jisasanya lao lao panenge endakali dupapi dupanya taiyoko dupa napala baa kyekea. Dopa piamo doko kandatala namba etete mona andeo.

⁷Dokopa^u enjele dokome namba langyoo, “Aipuma emba mona andelepe? Enda dokopa, mena kapua aiyomba kalange katenge dutupanya nenge kingi ita katenge dokome enda doko mandyuu paenge dokopa, dolaponya tenge yalo petae doko nambame emba langitoo.

⁸Embame^v mena kanjeno doko wamba kateamoaka doko, indupa dee nakalyamona tenda baa yuli koo etete koko dokonya katao pyakalyalanya pilyamona, pyakalyetala pao etete koyalakao koyata. Goteme yuu wasiamo dokonya pituu indupa tuu lao yuunya endakali dupa lete etete katenge kenge singi buku dokonya kenge nasilyamo endakali dupame mena wamba kateamo doko indupa nakatapala, dee katatamo kandatala tenge dokonya mona andatami.

⁹“Masingi^w endakali mendeme kapa pao dake masokondape pipenge. Mena dokonya aiyomba kalange dutupa yuu manda kalange mendatupa makande petae dokonyana, enda doko yuu manda kalange dutupanya ketae petenge. Aiyomba kalange dutupame kiŋi kalangeaka makande petae. ¹⁰Dutupanya yuungi isa patapiminopa indupa mendai kalyamo. Mende doko kiŋi jetala naelyamo. Maitakao baa kiŋi jetala gii kuki katapenge. ¹¹Mena wamba kateamo indupa nakalyamo doko kiŋi kalange dutupanya tukulapo joo katapala, baa koyalanya kalyamo.

¹²“Dopana,^x aiyombanya nenge kingi ita katapumu kanjeno dutupame kiŋi kingi itaka makande petae. Dutupame endakalipi yuupi dupa isetala naelyaminoaka doko, dupame mena doko-pipa awapa pupu lapae nyepala kiŋi katele lao kilyoko gii mendai katatami. ¹³Dutupame masingi mendai iki palyetala nyakamanya pupu lapaepi kyotopi dupa mena doko maingima.

^q 17:4 Jet 51:7; Ese 28:13,16; Pa 18:16 ^r 17:5 2 Te 2:7; 1 Pi 5:13; Pa 14:8 ^s 17:5 *babilone*
Pa 14:8 doko kandape. ^t 17:6 Pa 18:24, 19:2 ^u 17:7 Pa 13:1 ^v 17:8 Wee 69:28;
Dan 7:3,7; Pa 3:5, 11:7, 13:3-4,8 ^w 17:9 Pa 13:18 ^x 17:12 Dan 7:24

¹⁴Dopa^y petala dupa-pipa Sipisipi Yakane doko-pipa yanda pitaminopa Sipisipi Yakane dokome dupa ita minata. Doko, baa kamongo dupanya Kamongo katao kiŋi dupanya Kiŋi kalyamo. Goteme ipupa latae endakali dupapi, yapao nyepae endakali dupapi, baa yakinala naenge endakali dupapi dupame baa-pipa katao ita minatamiakana,” lao enjele dokome lea.

¹⁵Dee^z baame namba langyoo, “Enda akali nyele-nyele paenge doko pitipya dosa endaki longo ipao satyalamo kanjeno dutupame endakali longo limbao kalyamino dupapi, endakali yonge waka waka katenge dupapi, pii wakale wakale lenge dupapi, yuu pitakanya endakali tata dupapi dupa makande petae. ¹⁶Aiyombanya^a nenge kingi ita mende katapumu kanjeno dupapi, mena dokopi dupame enda akali nyele-nyele paenge doko kandao mona koo palitami. Dupame baanya oapi dupa koyasetala, baa papata petena lao baanya yongenya pingi dupa lyokao nepatamiaka. Dopa petala dupame baanya yonge dupa napala itatenya yangatami. ¹⁷Doko, dupame Gotenya masepae watao minina lao Goteme dupa masepae maitala, dupa mona mendai palyoo katao, dee nyakamanya isingi kalai dupa mena doko maiyoo pao Gotenya pii leamo doko angi jetamo dokonya tuu lena lao masepae maiyaka. ¹⁸Embame^b enda kanjeno dokome, yuu taono andake yuunya kiŋi dupa isilyamo doko makande petaena,” lao enjele dokome lea.

Taono andake Babilone doko koyatelyamona leamo doko

18 ¹Dee^{c d} maitakao enjele waka mende kaiti-kisa katao isa epeamo kandeo. Baa etete pupu lao tii pipae dokome yuu doko tii pisia.

²Dopa^e petala baame etete puu lao lao pituu,

“Taono andake Babilone^d doko koyatelyamo.

Kiningi, koyatelyamo.

Yuu dokonya enjele koo Satane jepae dupame tenge yawatala, enjele koopi, yaka^gauu nakayapenge koo dupapi dupa pitaka yuu dokonya anjetae joo katengema.

³Doko^h aipuma? Babilone yuu dokome baanya akali elya pingi pyoo paenge mana kyoto endaki waene jepae doko,

yuu dupa pitakanya endakali tata dupa pitakame nena lao maiya.

Dopa piamopa, yuunya kiŋi dupame baa-pipa kepo koleami.

Baame pitoo lao masiamo dupa pitaka pyaanya baanya muni longo paka siamo dokonya pisinisa kalai pingi endakali dupame muni longo nyiamina,” lea.

^y 17:14 Dit 10:17; Dan 2:47; 1 Ti 6:15-16; Pa 19:16 ^z 17:15 Ais 8:7; Jet 47:2, 51:13;

Dan 3:4 ^a 17:16 Lep 21:9; Ese 16:37-41, 23:25-29 ^b 17:18 Pa 11:8 ^c 18:1 Ese 43:2

^d 18:1-19:4 Jet 50:1-46 ^e 18:2 Ais 13:21-22, 21:9, 34:11,14; Jet 50:15,39, 51:8

^f 18.2 *babilone* Pa 14:8 doko kandape. ^g 18.2 *yaka* Jutamanya mana dokome yaka tata

mendapua koo kaimala pipaena nala nayatama lao nee nyetae-pyaa. ^h 18:3 Ais 23:17; Jet 25:15,27, 51:7; Pa 14:8

- ⁴Deeⁱ pii mende kaitinya katao lea dokome lao pituu,
 “Nyakama baanya koo dokopa kopataminopa,
 baa kenda pipae nyetamo dokonya aopyoo latala nyakama apata
 nyetamina,
 nyakama nambanya endakali dupame yuu doko yakinatala ipupa!
- ⁵Doko,^j baanya koo dupa eteteaka andake pyoo mau pyatae katao pao
 kaitinya tuu lea.
 Goteme yuu dokonya koo dupa pitaka masetae kalyamo.
- ⁶Enda^k dokome nyakama-kisa piamolli pyoo nyakamame yanu pyao
 pitamino dokonya
 baame piamo dopaleaka dee mende apata waipa soo pyepape.
 Baame kapo penge mendenya nyakamanya endaki waene depa
 lekeamolli pyoo
 nyakamame baanya depa lakamaiyoo pituu
 wakao dopaleaka mendatupa waipa soo depa lakamaiyepape.
- ⁷Baame^l baa tange lalyoo yongenya pyuani kayamo dupa pitaka
 piamolliaka pyoo
 nyakamame baa tanda maiyoo mona minao kenda pialapape.
 Doko baame baanya mona dokome,
 ‘Namba enda kuini joo pilyona, walyakae joo napilyona,
 mona kenda pisingi mende nakandatona,’ lenge
- ⁸Dopa^m lao masingi dokonya kenda pipae dupa yuu gii mendainyaka
 baa-kisa ipata.
 Yainapi, mona kenda pisingipi, lopo andakepi dupa
 baa-kisa epena latala baa itateme yangata.
 Kini, baa yapatamo Kamongo Gote doko pupu lapaena,” lea.
- ⁹Baaⁿ ° kepo petala pyuani kayamino dupa pitaka pyoo eteamino
 yuunya kiñi dupame baa itatenya tatamo kena doko kandatala ee lao
 yamataka latami. ¹⁰Baa^p tanda koo natamo dokonya dupame pakame
 kumapala, tependa katao lao pituu, “Bapilone yuu taono andake pupu
 lapae emba Goteme kilyoko gii mendai ikinya yanu nyoo yapelyamona
 kondo etete kondo,” latami.
- ¹¹Yuunya^q pisinisa pingi endakali dupame yuu doko lao masetala ee
 lao mona kenda kayao pitami. Doko aipuma? Endakalimi nyakamanya
 pinju dupa dee sambala nayatami. ¹²⁻¹³Golopi,^r silipapi, kana auu pipae
 muni longome sambengepi, mamakupi, lapalapa kyoo lao auu pipaepi,
 wene pyapaepi, penapena pipaepi, kate pyapepi, ita tunduma auu pipae

ⁱ 18:4 Ais 48:20, 52:11; Jet 50:8, 51:6,45; 2 Ko 6:17 ^j 18:5 Jen 18:20-21; Jet 51:9

^k 18:6 Wee 137:8; Jet 16:18, 50:15,29; 2 Te 1:6 ^l 18:7-8 Ais 47:7-9 ^m 18:8 Lep 21:9;

Jet 50:34; Pa 17:16 ⁿ 18:9 Ese 27:30-35; Pa 17:2 ^o 18:9-10 Ese 26:16-17

^p 18:10 Dan 4:30 ^q 18:11 Ese 27:31,36 ^r 18:12-13 Ese 27:12-13,22

pingi tata tatapi, mena elepene nengeme wasepae tata tatapi, ita yole andakeme sambengepi, kana botonjapi, aenepi, kana yati pipaepi dupame wasepae dupapi, nee tende pisingi ita yanu sinamonepi, itamaiyapi, ita kena tunduma pina lao yangenge dupapi, wele tunduma pipaepi, kena tunduma pipae pingi pautapi, endaki waenepi, olipi ipangepi, nee palawa epepi, wiisa diipi, pulumakawapi, sipisipipi, mena osame pyalya lelyamopa pituu paengepi, kendemanepi, endakali sambengepi, dupa dee sambala nayatami. ¹⁴Pisinisa pingi endakali dupame lao pituu, “Embame opale nyepawanimi kumiino dupa etapala, oapi auu pipae yole andakeme sambenge tata tata dupapi, embanya yati auu pipae dupapi dupa koyatelyamona, embame dutupa dee nakandatena,” latami.

¹⁵⁻¹⁷Oapi^{s t u} dopale dupame pisinisa petala taono dokonya muni longo nyiamino endakali dupame taono doko etete koyatamo dokonya paka kayapala tependa katatami. Dopa petala dupame ee lao mona kenda kayao lao pituu, “Wamba kolosa kyoo lapaepi, wene pyapaepi, kate pyapaepi, golopi, kana auu pipae muni longome sambengepi, mamakupi, dupame baa yati peteana, taono dokonya oapi epe dupa kilyoko gii mendai ikinya koyatamo dokonya taono andake doko kondo etete kondo,” latami. Dee endakinya paenge sipi lyaa miningipi, sipi sambapala yuu mendakaita penge endakalipi, sipinya kalai pingi akalipi, solowata pete dokonya pisinisa pingi endakali dupapi, dupa pitaka Babilonenya tependa katatami. ¹⁸Taono^v doko yangatamopa kena kandatala puu lao lao pituu, “Taono andake dakepa kapa pao taono anduku silyape?” latami. ¹⁹Dupame^w nyakama tangenya aiyombanya kenai lumbao pyasoo mona kenda kayao eaka lao puu lao lao pituu, “Sipi setenge endakali dupame solowata petenya payatala taono andake dokonya muni longo silyamopa nyepala kamongo jingimana, taono andake doko kilyoko gii mendai ikinya koyatelyamo dokonya kondo etete kondo,” latami.

²⁰Kaitinya^x katengepi, Gotenya endakalipi, aposelepi, potopesapi, nyakama pitakame taono doko kandatala mona yaepalapape. Doko Goteme nyakama lao masetala taono doko yapapala yanu nyepelyamo.

²¹Enjele^y kyoto mendeme kana etete andake mende minalyetalata solowata pete dokonya pyale latala lao pituu, “Dopaka pyoo Goteme taono andake Babilone doko nyepala puu lao pyale latamopa endakali dupame kapa pao dee nakandatami. ²²Dopana^z gitaa pingipi, linu lengepi, pulupapu lengepi, beto pingipi dupa dee nasetami. Oapi tata tata dupa wasingi endakali dupanya mende nakandao wiisa dii indingisa

^s 18:15 Ese 27:31,36 ^t 18:16 Ese 28:13; Pa 17:4 ^u 18:17 Ais 23:14; Ese 27:27-30

^v 18:18 Ese 27:32 ^w 18:19 Ese 27:30-34 ^x 18:20 Dit 32:43; Wee 96:11; Ais 44:23,

49:13; Jet 51:48; Pa 19:1-2 ^y 18:21 Eke 15:5; Jet 51:63-64; Ese 26:21 ^z 18:22 Ais 24:8;

Ese 26:13

kana ningi nango lenge doko dee naseteamiaka. ²³Ita^a tao katenge doko dee natata. Akali enda kelyao enda akali pao pilyamopa pii lenge doko dee naseteamiaka. Doko aipuma? Wamba Babilone dokonya pisinisa pingi endakali dupame yuunya etete andake joo kateaminopa, baame topoli joo yuu pitakanya endakali dupa minakasiana,” lea.

²⁴Potopesapi,^b Gotenya endakalipi, yuunya endakali taono Babilone dokome taiyoko nyiamo dupa pitakapi dupanya tenge doko baa-kisa dia.

Taono Babilone doko koyasiamo dokonya tama piamino doko

19 ¹Dee maitakao siopa kaitinya katao keekae mende endakali kambu andake mendeme lee lao lao pituu, “Naimame Gote lao tama pimana! Naimanya Gote dokome endakali pyoo nyoo katenge. Baa pupu lao tii pyoo katengeaka! ²Baame^c mana angipi tolataepi minao endakali dupa yapenge. Enda akali nyele-nyele^dpaenge dokonya mana dokome yuunya endakali dupa koyasiamo doko baa Goteme yanu nyoo yapea. Dee enda dokome Gotenya kendemane dupa taiyoko nyiamo dokonya Goteme yanu nyiakana,” leami.

³Dupame^e deaka lao pituu, “Baa yangeamo doko tao koteaka lao kena pyoaka katengena, naimame Gote lao tama pimana,” leami. ⁴Dokopa^f isingi akali kingi ita lapoma-kisa dee kitomendepi opale lenge tenge kitomendepi dupame kinji petenge toko dokonya petenge Gote doko kandao tama pyoo pituu, “Kiningi, naimame Gote lao tama pimana!” leami. ⁵Dopa^g leaminopa kinji petenge toko dosa katao pii mende lao pituu, “Gotenya kendemane endakali kenge singi dupapi, meepe, Gote paka kaengepi nyakama pitakame naimanya Gote doko lao tama pyepa!” lea.

Sipisipi Yakane dokome enda yoko pyao watapae pyatamo doko

⁶Dokopa^h keekae mende leamo dokonya endakali kambu longo mendeme lengepi, endaki andake oo lengepi, kaiti toka andake lengepi dopale joo lao pituu, “Naimanya Kamongo Gote eteteaka pupu lapae naima isoo katenge doko lao naimame lalyemana! ⁷Naimaⁱ mona yaepao eteke pyao baa lao lalyemana! Doko aipuma? Sipisipi Yakane dokonya enda yoko pyapenge^jgii doko ipatetyamo. Baanya enda doko depa latae pitipilyamoaka. ⁸Goteme^k enda doko kolosa kaimala napingi eteteaka

^a 18:23 Ais 47:9; Jet 7:34, 16:9, 25:10 ^b 18:24 Jet 51:49; Ese 24:7; Mt 23:35-37;

Pa 6:10, 16:5-7, 17:6, 19:2 ^c 19:2 Dit 32:43; 2 Kin 9:7; Jet 51:48; Pa 6:9-10, 11:8, 16:7

^d 19.2 akali nyele-nyele Pa 17:1 doko kandape. ^e 19:3 Ais 34:10; Pa 4:11 ^f 19:4 Pa 4:9-10

^g 19:5 Wee 22:23, 115:13, 134:1, 135:1 ^h 19:6 Eke 15:18; Wee 22:28, 93:1, 97:1, 99:1;

Ese 1:24, 43:2; Dan 7:14; Pa 1:8,15,17, 14:2, 15:3, 21:2 ⁱ 19:7 Wee 118:24; Mt 22:9;

Ep 5:25-27; Pa 11:17 ^j 19.7 enda yoko pyapenge Kataisame baanya sosa doko lanyoo

kaitinya patamo doko kandao kongali lao enda yoko pyapenge lelyamo. ^k 19:8 Ais 61:10; Mt 22:12; Pa 15:6

kyoo lapae mende maipumu petae pilyamona,” leami. Kolosa kyoo lapae doko Gotenya endakali dupame mana tolao miningi doko.

⁹Dee^l enjele dokome namba langyoo, “Embame pii datupa pepa pyape: ‘Sipisipi Yakanenya enda yoko pyao watapae pyatamo dokonya epena latae endakali dupa mona yaepena! Pii dutupa Gotenya pii kiningi etetena,” lea. ¹⁰Dopa^m lateamopa nambame baa lao tama pyaanya baanya moko kateamo dosa isa luma lakeo. Dopa piwaka doko, baame lao pituu, “Embame dopa napi. Nambame embapi Jisasame pii leamo minilyamino embanya masoo miningi kaiminingi dupapi nyakama-pipa kalai mendai pingina, embame Gote lao tama pipi,” lea. Jisasame pii leamo dupa potopesa dupame pii leamino dupanya angi doko.

Mena osa kyoo lapae maitanya peteamo doko

¹¹Kaitiⁿ doko wakale pyoloo petae siamopa mena osa kyoo lapae mende kateamo kandeo. Dokonya peteamo doko kenge Angi Tolatae lenge. Baame mana tolatae minao endakali dupa yapenge. Dee, mana tolatayaka minao yanda pingi. ¹²Baanya^o lenge dolapo itate yuli jiamopa baame kinjinya balu mandipala kinji longo isoo katea. Dopa piamopa kenge mende baa-kisa pyatae katea. Kenge doko mendeme masala naelyamopa baa tangeme iki masingi-pyaa. ¹³Baa^p yonge pee londe taiyoko pata-pata petae mende petae katea. Baanya kenge doko Gotenya Pii lapae lenge. ¹⁴Kaitinya yanda singi amii dupame yonge pee londe kyoo lapae kaimala napingi dupa petala mena osa kyoo lapae dupanya pituu baa watao peami. ¹⁵Baame^q netesa endakali dupa pyatopa lao baanya nengekaita konjua nenge katapae mende pyakaetae katea. Baame aene kolyepe mende minao netesa endakali dupa iseta. Getepe lyao indingi yuli dokonya baame getepe indyeta. Indyetamopa waene ipatamo doko Gote eteteaka pupu lapae dokonya imbu kaenge andake doko. ¹⁶Baanya^r yonge peepa paingipa dolaponya dapa lao kenge pyatae katea: KINI DUPANYA KININA dee KAMONGO DUPANYA KAMONGONA latae katea.

¹⁷Dee^s enjele mende niki lenge dokonya kateamo dokome yaka kaitipa kopao pee lao payamino dupa puu lao wii lao lamaiyoo, “Nyakama Gotenya nee andake dokonya nalapale limbalapa. ¹⁸Nyakamame kinjipi, yanda singi amii isingi mupapi, akali pupu lapaepi, mena osapi, osanya petenge akalipi, kendemanepi, meepi, kenge singipi, nasingipi, dupa pitakanya yonge dupa nalapa,” lea.

¹ 19:9 Mt 8:11, 22:2-3; Lu 14:15; Pa 1:3 ^m 19:10 Ap 10:25-26; Pa 22:8-9

ⁿ 19:11 Wee 96:13; Ais 11:4; Ese 1:1; Sak 1:8, 6:3,6; Pa 1:5, 3:7,14, 6:2 ^o 19:12 Dan 10:6;

Pa 1:14, 2:17-18 ^p 19:13 Ais 63:1-3; Jo 1:1,14 ^q 19:15 Wee 2:9; Ais 49:2, 63:3; J.Ee 1:15;

Joe 3:13; Pa 1:8,16, 2:12,16,27, 4:8, 12:5, 14:20 ^r 19:16 Dit 10:17; Dan 2:47; Pa 17:14

^s 19:17-18 Ese 39:17-20

¹⁹Dokopa^f mena kapua mendepale dokopi, yuunya kiŋi dupaapi, dupanya yanda singi amiipi dupame mena osanya peteamo dokopi, dokonya yanda singi amiipi dupa yanda pimaiyanya kapeami. ²⁰Yanda^u petala osanya peteamo dokome mena kapua dokopa, dokonya enombasa kongali dupa pyoo kateamo sambo potopesa dokopa dolapo anjia. Sambo potopesa dokome kongali piamo dupame endakali mena wangi tao wasepae doko lao lalyingi dupapi baanya kongali petae dupapi dupa minakasia. Mena kapua dokopa sambo potopesa dokopa dolapo lenge taputa kana itateme tao aluoo^okatenge itate pete andake dokonya soo pyandea. ²¹Dokopa^w kiŋi dupapi, dupanya yanda singi amii dupapi dupa akali osanya peteamo dokome baanya nengekaita konjua pyakaetae kateamo dokome kepao kumasia. Dopa peteamopa yaka dupa pitakame ipao dupa nao etete tomba kendeami.

Satane doko ee kana taosene mende anjetae paleamo doko

20 ¹Dokopa^x enjele mendeme kaiti-kisa katao yuli koo etete koko dokonya kii dokopa ŋili kende andake mendepa minao epeamo kandeo. ²Ipupala^y baame kanopato pambea yuu wambatae waka endakali pitaka-kisa tenge setenge kenge Satane lenge doko minatala ee kana taosene mende maiyoo sene kende dokome anjia. ³Anjetala^z baame ee kana taosene mende yuu pitakanya endakali tata dupa minakasala naena lao yuli koo etete koko dokonya pyandatala, kaita piti pyaakao pimbia. Ee kana dutupa patatamopa, maitakao baa mokapae gii kuki katapenge.

⁴Dee^a kiŋi petenge toko mendapuanya peteamino dupame endakali dupa yapena lao Goteme dokaita pupu lapae maiya. Dee Jisasame pii leamo dokopi Gotenya pii dokopi lamaiyamino tenge dokonya yandapipi dupame mange kepeamino dupanya imambu dupa peteami. Mena kapua dokopa doko wangi tao wasepae dokopa dolapo tama pyaa nayao, mena dokonya kongali doko nyakamanya langalupi kingipi dupanya kongali pyaa nayawaka piamino endakali dupa ee kana taosene mendepa kapa lao Kataisapa kiŋi joo lete etete katapenge jia. ⁵Doko wambao lete etete katatamino doko. Endakali waka kumiamino dupame ee kana taosene mendai doko patena lao malisepenge jia. ⁶Endakali^b wambao lete etete katatamino dupa etete epe joo mona yaepena. Lapo pyoo kumingi doko dupa-kisa nasetamopa, Gotepa Kataisapanya pitisa joo ee kana taosene mendepa kapa lao Kataisa-pipa kiŋi joo isoo katatami.

^f 19:19 Wee 2:2; Pa 17:12-14 ^u 19:20 Ais 30:33; Dan 7:11; Mt 7:15; Pa 13:12-17, 14:10, 20:10,15 ^o 19:20 kana itateme tao aluoo Pa 9:17 doko kandape. ^w 19:21 Ese 39:17,20; Pa 19:17-18 ^x 20:1 Pa 9:1 ^y 20:2 Jen 3:1; Mt 12:28-29; Pa 12:7,9 ^z 20:3 2 Te 2:6-8; 2 Pi 2:4; Ju 6; Pa 12:12 ^a 20:4 Dan 7:9,22,27; Mt 19:28; Lu 22:30; 1 Ko 6:2; Pa 5:10, 13:15-17 ^b 20:6 Eke 19:6; Ais 61:6; 1 Pi 2:5,9; Pa 1:6, 2:11, 5:10

Satane etete koyata

⁷Maitakao ee kana taosene mendai doko ipao patatamopa Satane anjetae palenge anda kaita doko lumbapala baa mokata. ⁸Dokopa^c baame yuu pitakanya yangi yangipi lita dutupanya endakali dupa minakasalanya pata. Pupala Goko^d endakalipi, Mekoko endakalipi dupa yanda pina lao nyoo kambu pyatamopa dupanya itaki yaki doko endaki kee jeta. ⁹Dokopa^e dupame yuu dupa pitakanya payapala, Gotenya endakali elyambu pyoo palengema yuu dokopa, Goteme etete auu kaenge taono dokopa dolapo katao kakopatami. Dopaka doko, kaitinya itate doko ipupala, dupa tao etata. ¹⁰Dupa^f minakasingi Satane doko kana itateme tao aluoo^g katenge itate pete andake dokonya soo pyandata. Kapua dokopa sambo potopesa dokopa dolapo dokonya pateambina, dutupa kuka kotakapi koteaka lao tanda koo nao katatami.

Kiñi petenge toko dokonya petenge dokome endakali yapea

¹¹Dokopa^h ⁱ kiñi petenge toko andake kyoo lapae mende siamo dokonya mende peteamo kandeo. Yuupa kaitipa dolapome baa paka puu pao peaminopa dee kandapenge nanjia. ¹²Kenge^j ^k singi endakalipi, mee endakalipi kumateamino dupa kiñi petenge toko enomba dosa kateaminopa, buku mendapua lyangea. Dee buku waka mendeme lyangeamo doko endakali lete etete katenge kenge singi buku doko lyangea. Kiñi petenge toko dokonya petenge dokome endakali kumateamino dupanya mana miniamino dupa bukunya pepa pyapae siamo dokonya-kaita yapea. ¹³Solowata petenya mangapala kumiamino dupa dee sakateami. Kumapala malu katengepi dupa pitaka dee sakateaminopa, kiñi petenge toko dokonya petenge dokome dokaitanya mana miniamili pyoo yapea. ¹⁴Kiñi^l petenge toko dokonya petenge dokome kumingi mana dokopa yuu koo dokopa dolapo itate pete andake dokonya pyandea. ¹⁵Lete^m etete katenge endakali dupanya kenge singi buku dokonya endakali mendenya kenge nasiamo kandao doko, kiñi petenge tokonya petenge dokome itate pete andake dokonya soo pyandea.

^c 20:8 Ese 7:2, 38:2,15-16,19 ^d 20:8 goko, mekoko Kenge lapoma dolapome yuu pitakanya endakali Gotenya yandapipi dupame yuu gii etalanya pitamopa Gote yanda pimaiyanya ipatamina lao kongali latae silyamo. ^e 20:9 2 Kiñ 1:10; Ese 38:22, 39:6; Lu 21:24

^f 20:10 Jen 19:24; Wee 11:6; Ais 30:33; Ese 38:22; Pa 19:20, 20:15, 21:8 ^g 20:10 kana itateme tao aluoo Pa 9:17 doko kandape. ^h 20:11 Wee 114:3,7; 2 Pi 3:7,10,12; Pa 21:1

ⁱ 20:11-12 Dan 7:9-10; Mt 25:31-46 ^j 20:12 Eke 32:32-33; Wee 69:28; Dan 12:1; Lu 10:20; Ap 17:31; Pl 4:3; Pa 3:5, 13:8, 17:8, 20:5, 21:27 ^k 20:12-13 Wee 28:4, 62:12; Pot 24:12; Ais 59:18; Jet 17:10; Lo 2:6; 2 Ko 5:10, 11:15; 2 Ti 4:4; 1 Pi 1:17; Pa 2:23, 18:6, 22:12

^l 20:14 1 Ko 15:26,55; Pa 19:20 ^m 20:15 Ais 30:33; Mt 25:41; Pa 3:5, 19:20, 20:10, 21:8

Yuupa kaitipa enenge siamo doko

21 ¹Dokopaⁿ ° yuupa kaitipa enenge mendalapo sia. Doko, yuupa kaitipa wambatae dolapo puu peteambinopa solowata pete doko dee nasia. ²Taonop^p enenge etete epe Jetusaleme doko Goteme kaitinya katao pyandeamopa enda mapuakae mende akali paanya yati pyoo depa lengeli petae epea. ³Kiñiq^q petenge toko dokonya pii mende leamo dokome puu lao lao pituu, “Salapape. Indupa Gotenya anda doko endakali dupanya kainanya kalyamo. Baa dupa-pipa katatamopa endakali dupa baanya joo katatami. Baaka dupanya Gote joo dupa-pipa awapa katata. ⁴Baame^r lengenya ee ipange dupa pitaka kunanya nepakamaita. Dopa pitamopa endakali dupa-pipa kumingi mana doko dee nasetamopa, dupa mona dee kenda nakayao dupa deaka ee lao tanda nala nayatami. Doko dopale wamba piamo dupa etapelyamona,” lea.

⁵Kiñis^s petenge toko dokonya petenge dokome lao pituu, “Nambame dupa pitaka enenge injisilyona,” lea. Dee baame lao pituu, “Pii doko masoo minapenge kiningi etetena, embame pepa pyape,” lea. ⁶Deaka^t baame namba langyoo, “Dupa pitaka nambame petelyo. Tee pingipi etengepi doko namba. Oapi dupanya tee pyawapi etawapi doko nambaka. Endakali mende endaki nanu kayatamo doko lete katasingi endaki lee kuingi dokonya nena lato. ⁷Koo^u dupa yanda pimaiyoo ita minatamo endakali dokome dutupa pitaka namba-kisa nyeta. Namba baanya Gote joo katatopa, baa nambanya wane joo katata. ⁸Dopaka^v doko, pakali joo katenge endakalipi, masoo minala naengepi, mana koo kapa pao naminapenge dupa miningipi, endakali pyao kumasingipi, endakalipi nyele-nyele paengepi, nemango miningipi, sambo gote tama pyoo katengepi, sambo lengepi endakali dopale dupanya yuu doko kana itateme tao aluoo^wkatenge itate pete andake dokona, dokonya lapo pyoo kumatamina,” lea.

Jetusaleme enenge doko

⁹Enjelex^x kalangeme kenda pipae kalange etao ipatamo dupa pelesa kalanganya tumbatae minao katengema dutupanya mende namba kateosa ipupala lao pituu, “Sipisipi Yakane dokonya enda lanyalanya pilyamo doko nambame laitaka pito, ipu,” lea. ¹⁰Sipitisa^y dokome namba

ⁿ 21:1 Ais 65:17, 66:22; 2 Pi 2:3 ° 21:1-4 Pa 7:15-17 P 21:2 Ais 52:1, 61:10; Lo 8:19-23; Ip 11:16, 12:22; Pa 3:12, 19:7-8 ° 21:3 Lep 26:11-12; 2 Ktl 6:18; Ais 8:8; Sak 2:10; 2 Ko 6:16; Pa 7:15-17 ° 21:4 Ais 25:8, 35:10, 65:19; Pa 7:17 ° 21:5 Ais 43:19; 2 Ko 5:17; Pa 4:2,10 ° 21:6 Wee 36:9; Ais 44:6, 48:12, 55:1; Jet 2:13; Jo 7:37; Pa 1:8,17, 22:13,17 ° 21:7 2 Sam 7:14; Wee 89:26-27; 2 Sam 7:14; Pa 22:15 ° 21:8 Ais 30:33; Mt 25:41; Lo 1:29; Ip 10:38-39; Pa 19:20, 20:10,15, 22:15 ° 21:8 kana itataeme tao aluoo Pa 9:17 doko kandape. ° 21:9 2 Ko 11:2; Pa 15:1 ° 21:10 Ese 40:2; Ip 11:10; Pa 21:2

sakatasiamopa enjele dokome namba nyoo yuu manda andake etete ketae mendenya pea. Pupala taono etete epe Goteme kaitinya katao pyandeamo Jetusaleme doko namba laitaka pia. ¹¹Gotenya^z tii pipae dokome taono doko tii pisia. Tii dokome kana etete epe kamalawai pyapae jasapaa kana dopale joo tii pyoo galasa polepole pili pia. ¹²Taono^a doko kakopao kaname lome andake pyoo pyoo etete ketae patae katea. Lome dokonya kambu kingi ita mende-kisa dee lapoma siamopa, dutupanya enjele kingi ita mende-kisa dee lapoma kateami. Lome kambu dutupanya Isataele yumbange kingi ita mende-kisa dee lapoma dutupa kenge pyatae katea. ¹³Lome dokonya niki pyakaengesa-kaitapi, niki landa pingisa-kaitapi, dee lemba yangi yangipi dutupanya kambu tepoma lawaka lumbao nyetae katea. ¹⁴Taono^b dokonya lome doko kyoto injisoo kana kingi ita mende-kisa dee lapoma isa pisetae dutupanya Sipisipi Yakane dokonya aposele kingi ita mende-kisa dee lapoma dutupanya kenge pyatae katea.

¹⁵Enjele^c namba pii langiamo dokome taono dokopi, dokonya lome dokopi, lome kambu dutupapi, dupa makande pyaanya makande ita golome wasepae mende minatae katea. ¹⁶Taono^d doko etete kapakapa latae. Londepi andakepi dupa mendai dopale etete. Enjele dokome baanya makande pingi dokome piamopa, makande doko sitetiame^etausene kingi ita mende-kisa dee lapoma jia. Taono dokonya londepi, andakepi, ketaepi dupa pitaka makande mendai dopaleaka jia. ¹⁷Lome pyoo kisetae doko apata baame makande pima-pima piamopa lome makande doko kingi ita kitomende-kisa dee yuungi jia. Enjele dokome makande piamo doko endakali dupame nyakamanya oapapi dupa makande pingima dopale mendeme lome doko makande pia. ¹⁸Goteme^f lome kana kamalawai pyapae jasapaame petala, taono doko golo etete epe kuni nasingimi wasiamosa galasa kuni nasingi etete epe joo polepole pia. ¹⁹Taono doko kakopao lome petae doko kyoto injisoo kana isa siamo dupa kana tata tata yole andake penge dupame yati petae sia. Kana kamalawai pyapae jasapaa doko wambao sia. Laponge doko wene pyapae sapaya lenge. Teponge doko kyoo lapae palipa kamalawai palipa pingi aketa lenge. Kitomende doko sakapae emetele lenge. ²⁰Yuungi doko kate pyapae

^z 21:11 Ais 60:1-2,19 ^a 21:12-13 Eke 28:1; Ese 48:30-35; Pa 7:1-8 ^b 21:14 Ep 2:20

^c 21:15 Ese 40:3,5; Pa 11:1 ^d 21:16-17 Ese 48:16-17 ^e 21:16 *sitetiame* Sitetiame ongo makande mende. Makande dokome kaitinipi taonopi dupa andake aipalepe lao makande pingi. Makande doko minao enjele dokome taono doko makande piamopa itaki yaki doko tausene kingi ita mende-kisa dee lapoma jia. Itaki yaki kingi ita mende-kisa dee lapoma dokome Gotenya tata dupa pitaka makande pilyamo. Itaki yaki tausene dokome taono dokonya opale mende daa jala nayao kapa pataena lao makande pilyamo. Dopa pilyamo dokome Gotenya endakali dupa taono dokonya kalyanya mendita mende daa jala nayao kapa pataena lao makande sitetiame tausene kingi ita mende-kisa dee lapoma dokome kongali lao lelyamo. ^f 21:18-21 Ais 54:11-12

palipa kyoo lapae palipa pingi satonikisa lenge. Tokange doko kate pyapae kaniliane lenge. Kalange doko kakai pyapae kitisolaita lenge. Tukulapo doko sakapae waka mendepale betila lenge. Mange mende pyomondo doko lyatapae waka mendepale topasa lenge. Kingi ita doko sakapae palipa lyatapae palipa pingi kitisopetesa lenge. Kingi ita-kisa dee mendai doko wene pyapae waka mendepale ayasina lenge. Kingi ita-kisa dee laponge doko kate pyapae mendepale ametisa lenge. ²¹Lome dokonya kambu kingi ita-kisa dee lapoma dutupa mamakumiaka pai latae katea. Taono dokonya kaitini dupa golo etete epe dupame wasepae dupa kunipi mende nasoo galasa joo pole pole pia.

²²Nambame^s taono dokonya losuu anda mende kateamo nakandeo. Doko, Kamongo Gote eteteaka pupu lapae dokopa Sipisipi Yakane dokopa dolapo losuu anda andake joo kateambi. ²³Taono^h dokonya nikipa kanapa dolapome tii pisina lao yangyala naya. Doko Gotenya tii pipae dokome tii pisetae. Sipisipi Yakane doko taono dokonya lama jepae. ²⁴Yuuⁱ pitakanya endakali dupa taono tii pipae dokonya payatami. Yuu dupanya kinji dupame nyakamanya auu pipae dupa minao dokonya ipatami. ²⁵Taono^j ^k dokonya yuu kuiyala nayatamosa dupame lome kambu dupa pai laa nayatami. ²⁶Yuu^l pitakanya endakali dupame nyakamanya munipi opale auu pipaepi dupa minao taono dokonya ipatami. ²⁷Dopaka^m doko, opale koyapaepi, mana koo kapa pao naminapenge dupa miningipi, sambo lengepi, dopale dupa kapa pao naipatami. Sipisipi Yakane dokonya endakali lete etete katenge kenge singi buku dokonya endakali mendapuanya kenge pyakamaiyamo dupa iki taono dokonya ipatami.

Lete katasingi endakipa itapa dolapo

22 ¹⁻²Deeⁿ ^o enjele dokome lete katasingi endaki andake galasa joo polepole pipae doko namba laitaka pia. Endaki doko Gotepa Sipisipi Yakane dokopanya isoo petenge toko dokonya lee kuiyatala taono kaitini andake dokonya kainanya liyoo pea. Endaki dokonya omotena aetenapi lete katasingi ita dupa katea. Ita tata dokome ee kana mendainya paa kingi ita-kisa dee lapomasa dii mandelyamo doko kana dii lao mandenge-pyaa. Ita yoko dokome yuu pitakanya endakali dupa auu pisalanya katenge-pyaa. ³Goteme^p mendita mende auu nakayapala nepatoo lao masylyamo doko dee nakatata. Taono dokonya Gotepa Sipisipi Yakane dokopanya isoo petenge toko doko setamopa,

^s 21:22 Jo 2:19-21; Pa 1:8, 15:3 ^h 21:23 Ais 24:23, 60:1-2,19-20; 2 Ko 3:18; Pa 22:5

ⁱ 21:24 Ais 60:3,5 ^j 21:25 Sak 14:7; Pa 22:5 ^k 21:25-26 Ais 60:11 ^l 21:26 Wee 72:10-11

^m 21:27 Ais 35:5, 52:1; Sak 13:1-2; 1 Ko 6:9-10; 2 Pi 3:13; Pa 3:5, 13:18, 21:8, 22:15

ⁿ 22:1 Ese 47:1; Joe 3:18; Sak 14:8; Jo 4:14 ^o 22:2 Jen 2:9, 3:22; Ese 47:12; Pa 2:7,

22:14,19 ^p 22:3 Sak 14:11; Pa 7:15

Gotenya kendemane dupame baa lao tama pyoo katatami. ⁴Dupame^q baanya lengelyaapi kandataminopa baame baanya kenge doko dupanya langalunya pepa pyanya katata. ⁵Yuu^r doko dee iminjala nayata. Kamongo Goteme endakali dupa tii pisetamo dokonya lamapi nikipi dupame tii pisina lao dupanya mende yangyala nayata. Dokopa dupame koteaka lao kinji joo isoo katatami.

Jisasa yapa ipata

⁶Dokopa^s enjele dokome namba langyoo lao pituu, “Pii buku dakenya pyatae silyamo dutupa angi kiningi etete. Potopesa dupanya masingi sakatasingi Kamongo Gote dokome baanya kendemane dupa-kisa yapa pipenge dupa baanya enjele dokome laitaka pyaa pena leana,” lea. ⁷Dopa^t leamopa Jisasame lao pituu, “Kandeleno! Namba yapa ipato. Gotenya opale tanga pitamo pii buku dakenya silyamo dupa watao miningi endakali dokome mona yaepao katenana,” lea.

⁸Namba^u Joneme pii dutupa kaleme soo oapi dutupa lengeme kandao pio. Dopa petala oapi namba laitaka piamo enjele doko tama pyaanya moko kateamo dosa isa luma lakeo. ⁹Dopaka doko, baame namba langyoo, “Embame dopa napi. Embapi, embanya masoo miningi kaiminingipi, potopesa dupapi, buku dakenya pii lapae watao miningi endakali dupapi dupa-pipa namba kalai mendai pingina, embame Gote lao tama pipi,” lea. ¹⁰Deaka^v baame lao pituu, “Gotenya pii bukunya silyamo doko embame yalo napipi. Pii lapae dokome pitana lelyamo dokonya gii doko tengesa petelyamo. ¹¹Koo^w pingi endakali dupame koo pyoaka katena. Mana koo miningi endakali dupame mana koo minawaka katena. Mana tolatae miningi endakali dupame mana tolatae minawaka katena. Etete epe joo katenge endakali dupame etete epe jowaka katenana,” lea.

¹²Jisasame^x lao pituu, “Kandeleno! Namba yapa ipato. Endakali mendai mendai lao dupame mana minataminoli pyoo nambame yole maiyanya ipato. ¹³Tee^y pingipi etengepi doko namba. Etete wambawapi etawapi doko namba. Oapi dupanya tee pyawapi etawapi doko nambana,” lea.

¹⁴Nyakamanya^z yonge pee londe kaimbu pingi endakali dupa mona yaepao kalyamino. Doko, dupame kapa pao lete katasingi ita dokonya

^q 22:4 Wee 17:15, 42:2; Mt 5:8; 1 Ko 13:12; 1 Jo 3:2; Pa 3:12 ^r 22:5 Ais 60:19-20; Dan 7:18,27; Sak 14:7; Pa 5:10, 20:6, 21:23,25 ^s 22:6 Dan 2:28-29,45, 8:26; Pa 1:1,19, 19:9, 21:5, 22:16 ^t 22:7 Pa 1:3, 2:16, 3:11, 22:12,20 ^u 22:8-9 Ap 10:25-26; Pa 19:10 ^v 22:10 Dan 12:4; Pa 1:3, 10:4 ^w 22:11 Dan 12:10 ^x 22:12 Wee 28:4, 62:12; Pot 24:12; Ais 40:10, 59:18, 62:11; Jet 17:10; Lo 2:6; 1 Ko 3:8; 2 Ko 11:15; 2 Ti 4:14; 1 Pi 1:17; Pa 2:16,23, 3:11, 18:6, 20:13,14, 22:7,20 ^y 22:13 Ais 41:4, 44:6, 48:12; Pa 1:8,17, 2:8, 21:6 ^z 22:14 Jen 2:9, 3:22; Ese 47:12; Pa 7:14, 22:2

dii lyao napala lome kambu dupanya-kaita taono dokonya kapa pao patami. ¹⁵Endakali^a yana jepae dupapi, nemango miningipi, endakalipi nyele-nyele paengepi, endakali pyao kumasingipi, sambo gote tama pyoo katengepi, sambo mana auu kayao miningi dupa pitakapi, dupa Gotenya taono dokonya kamalya katatami.

¹⁶“Namba^b Jisasame sosa dupa lao masetala nambanya enjele dokome pii dutupa nyakama-kisa lao panasala epena leo. Namba Dapitinya mandipaenya mandipae doko. Yuu yongao bui katenge etete tii pipae doko nambana,” lea.

¹⁷Sipitisa^c dokopa Sipisipi Yakanenya enda dokopa dolapome lao pituu, “Emba ipu,” leambi. Pii doko setamo endakali dokome “Emba ipu,” lapengeaka. Dokopa endaki nanu kayata endakali doko ipupenge. Endaki napuli lao masetamo dokome lete katasingi endaki Goteme mee dingi doko ipao napenge.

¹⁸Buku^{d e} dakenya pitana lapae silyamo pii dupa setamino endakali dupa pitaka kandao, namba Joneme pii kyoto dake lelyo. Endakali mendeme buku dakenya pii waka mende waipa setamo kandao doko, pii kenda pipae buku dakenya pyapae silyamo dupa endakali doko-kisa Goteme setata. ¹⁹Endakali^f mendeme Gotenya pii buku dakenya silyamo dupanya mende nepatamo kandao doko, lete katasingi ita buku dakeme lelyamo dokonya, baanya dii yangi Goteme nyoo nepatala, dee taono etete epe buku dakeme lelyamo dokonya, baa epena lao kayala nayataka.

²⁰Pii^g dutupa lelyamo dokome lao pituu, “Kiningi etete, namba yapa ipatona,” lelyamo.

Kapana, Kamongo Jisasa, emba ipu.

²¹Kamongo^h Jisasame Gotenya endakali pitaka kandao mona epe palena.

^a 22:15 Nam 5:1-4; Lo 1:29; 1 Ko 6:9-10; Pa 21:8,27 ^b 22:16 Nam 24:17; Ais 11:1,10;

Lo 1:3; Pa 1:1,11, 2:28, 5:5, 22:6 ^c 22:17 Sol 8:14; Ais 55:1; Jo 7:37; Pa 21:6

^d 22:18 Pa 15:1,6 ^e 22:18-19 Dit 4:2, 12:32 ^f 22:19 Jen 2:9, 3:22; Ese 47:12; Pa 22:2

^g 22:20 Ap 3:20-21; 1 Ko 15:23; Pa 2:16, 3:11, 22:7,12 ^h 22:21 2 Te 3:18